

摘藻堂四庫全書薈要

史部

欽定四庫全書薈要卷六千八百五十八史部

明史卷二百六十五

大學士張廷玉等奉 敕修

列傳第一百五十三

范景文

倪元璐

李邦華

王家彥

孟兆祥

子章明

施邦曜

凌義渠

崇禎十有七年三月流賊李自成犯京師十九日丁未
莊烈王殉社稷文臣死國者東閣大學士范景文而下
凡二十有一人福王立南京並予贈諡

皇清順治九年

世祖章皇帝表章前代忠臣所司以范景文琬元璐李邦
華王家彥孟兆祥子章明施邦曜凌義渠吳麟徵周鳳
翔馬世奇劉理順汪偉吳甘來王章陳良謨申佳允許
直成德金鉉二十人名上

命所在有司各給地七十畝建祠致祭且予美謚焉

范景文字夢章吳橋人父永年南寧知府景文幼負器識登萬歷四十一年進士授東昌推官以名節自勵苞苴無敢及其門歲大饑盡心振救闔郡賴之用治行高等擢吏部稽勲主事歷文選員外郎署選事泰昌時羣賢登進景文力為多尋乞假去天啓五年二月起文選郎中魏忠賢暨魏廣微中外用事景文同鄉不一詣其門亦不附東林孤立行意而已嘗言天地人才當為天

地惜之朝廷名器當為朝廷守之天下萬世是非公論
當與天下萬世共之時以為名言視事未彌月謝病去
崇禎初用薦召為太常少卿二年七月擢右僉都御史
巡撫河南京師戒嚴率所部八千人勤王餉皆自齎抵
涿州四方援兵多剽掠獨河南軍無所犯移駐都門再
移昌平遠近恃以無恐明年三月擢兵部添注左侍郎
練兵通州通鎮初設兵皆召募景文綜理有法軍特精
嘗請有司寔行一條鞭法徭役歸之官民稍助其費供

應行買不立官價名帝令永著為例居二年以父喪去
官七年冬起南京右都御史未幾就拜兵部尚書參贊
機務屢遣兵戍池河浦口援廬州扼徐陽有警輒發節
制精明嘗與南京戶部尚書錢春以軍食相訐奏坐鑄
秩視事已叙援勦功復故秩十一年冬京師戒嚴遣兵
入衛楊嗣昌奪情輔政廷臣力爭多被謫景文倡同列
合詞論救帝不悅詰首謀則自引罪且以衆論僉同為
言帝益怒削籍為民十五年秋用薦召拜刑部尚書未

上改工部入對帝迎勞曰不見卿久何癯也景文謝十七年二月命以本官兼東閣大學士入參機務未幾李自成破宣府烽火徧京師有請帝南幸者命集議閣中景文曰固結人心堅守待援而已此外非臣所知及都城陷趨至宮門宮人曰駕出矣復趨朝房賊已塞道從者請易服還邸景文曰駕出安歸就道旁廟草遺疏復大書曰身為大臣不能滅賊雪耻死有餘恨遂至演象所拜辭閱墓赴雙塔寺旁古井死景文死時猶謂帝南

幸也贈太傅謚文貞

本朝賜謚文忠

倪元璐字玉汝上虞人父凍厯知撫州淮安荊州瓊州
四府有當官稱天啓二年元璐成進士改庶吉士授編
修冊封德府移疾歸還朝出典江西鄉試暨復命則莊
烈帝踐阼魏忠賢已伏誅矣楊維垣者逆奄遺孽也至
是上疏並詆東林崔魏元璐不能平崇禎元年正月上
疏曰臣頃閱章奏見攻崔魏者必與東林並稱邪黨夫

以東林為邪黨將以何者名崔魏崔魏既邪黨矣擊忠
賢呈秀者又邪黨乎哉東林天下才藪也而或樹高明
之幟繩人過刻持論太深謂之非中行則可謂之非狂
狷不可且天下議論寧假借必不可失名義士人行已
寧矯潔必不可忘廉隅自以假借矯激為大咎於是彪
虎之徒公然背畔名義決裂廉隅頌德不已必將勸進
建祠不已必且呼嵩而人猶且寬之曰無可柰何不得
不然耳充此無可柰何不得不然之心又將何所不至

哉乃議者以忠厚之心曲原此輩而獨持已甚之論苛責吾徒所謂舛也今大獄之後湯火僅存屢奉明綸俾之酌用而當事者猶以道學封疆持為鐵案毋亦深防其報復乎然臣以為過矣年來借東林媚崔魏者其人已敗何待東林報復若不附崔魏又能攻去之其人已喬獄矣雖百東林烏能報復哉臣又伏讀聖旨有韓爌清忠有執朕所鑒知之諭而近聞廷臣之議殊有異同可為大怪爌相業光偉他不具論即如紅丸議起舉國

沸然爌獨侃侃條揭明其不然夫孫慎行君子也爌且不附況他人乎而今推轂不及點灼橫加則徒以其票擬熊廷弼一事耳廷弼固當誅爌不為無說封疆失事累累有徒乃欲獨殺一廷弼豈平論哉此爌所以閣筆也然廷弼究不死于封疆而死于局面不死于法吏而死於奸璫則又不可謂後之人能殺廷弼而爌獨不能殺之也又如詞臣文震孟正學勁骨有古大臣之品三月居官昌言獲罪人以方之羅倫舒芬而今起用之旨

再下謬悠之譚不已將母門戶二字不可重提耶用更
端以相遮抑耶書院生祠相勝負者也生祠毀書院豈
不當修復時柄國者悉忠賢遺黨疏入以論奏不當責
之於是維垣復疏駁元璐元璐再疏曰臣前疏原為維
垣發也陛下明旨曰分別門戶已非治徵曰化異為同
曰天下為公而維垣則倡為孫黨趙黨熊黨鄒黨之說
是陛下於方隅無不化而維垣寔未化陛下於正氣無
不伸而維垣不肯伸維垣怪臣盛稱東林以東林嘗推

李三才而護熊廷弼也抑知東林有力擊魏忠賢之楊

漣首劾崔呈秀之高攀龍乎忠賢窮凶極惡維垣猶尊

稱之曰廠臣公廠臣不愛錢廠臣知為國為民而何責

乎三才五彪五虎之罪刑官僅擬削奪維垣不駁正又

何誅乎廷弼維垣又怪臣盛稱韓爌夫舍爌昭然忤璫

之大節而加以罔利莫須有之事已為失平至廷弼行

賄之說乃忠賢借以誣陷清流為揚左諸人追賊地耳

天下誰不知維垣猶守是說乎維垣又怪臣盛稱文震

孟夫震孟忤璫削奪其破帽策蹇傲蟒玉馳驛語何可
非維垣試觀數年來破帽策蹇之輩較超階躡級之儔
孰為榮辱自此義不明畏破帽策蹇者相率而頌德建
祠希蟒玉馳驛者呼父呼九千歲而不忤可勝歎哉維
垣又怪臣盛稱鄒元標夫謂都門聚講為非則可謂元
標講學有他腸則不可當日忠賢驅逐諸人毀廢書院
者正欲箝學士大夫之口恣行不義耳自元標以偽學
見驅而逆璫遂以真儒自命學宮之內儼然揖先聖為

平交使元標諸人在豈遂至此維垣又駁臣假借矯激
夫當崔魏之世人皆任真率性頌德建祠使有一人假
借矯激而不頌不建豈不猶賴是人哉維垣以為真小
人待其貫滿可攻去之臣以為非計也必待其貫滿其
敗壞天下事已不可勝言雖攻去之不已晚乎即如崔
魏貫滿久矣不遇聖明誰攻去之維垣終以無可柰何
為頌德建祠者解臣以為非訓也假令呈秀一人舞蹈
稱臣於逆璫諸臣亦以為無可柰何而從之乎又令逆

璫以兵劫諸臣使從叛逆諸臣亦靡然從之以為無可
柰何而然乎維垣又言今日之忠直不當以崔魏為對
案臣謂正當以崔魏為對案也夫人品試之崔魏而定
矣故有東林之人為崔魏所恨其抵觸畏其才望而必
欲殺之逐之者此正人也有攻東林之人雖為崔魏所
借而勁節不阿或遠或逐者亦正人也以崔魏定邪正
猶以明鏡別妍媸維垣不取證于此而安取證哉總之
東林之取憎於逆璫獨深其得禍獨酷在今日當曲原

其被抑之苦不當毛舉其尺寸之瑕乃歸逆璫以首功
代逆璫而分謗斯亦不善立論者矣疏入柄國者以互
相詆訾兩解之當是時元兇雖殛其徒黨猶盛無敢頌
言東林者自元璐疏出清議漸明而善類亦稍登進矣
元璐尋進侍講其年四月請燬三朝要典言梃擊紅丸
移宮三議關於清流而三朝要典一書成於逆豎其議
可無行其書必當速燬蓋當事起議興盈廷互訟主梃
擊者力護東宮爭梃擊者計安神祖主紅丸者仗義之

言爭紅丸者原情之論主移宮者弭變於幾先爭移宮者持平於事後數者各有其是不可偏非總在逆璫未用之先雖甚水火不害損簏此一局也既而楊漣二十四罪之疏發魏廣微此輩門戶之說興於是逆璫殺人則借三案羣小求富貴則借三案經此二借而三案全非矣故凡推慈歸孝於先皇正其頌德稱功於義父又一局也網已密而猶疑有遺鱗勢已重而或憂其翻局崔魏諸奸始創立私編標題要典以之批根今日則衆

正之黨碑以之免死他年即上公之鐵券又一局也由
此而觀三案者天下之公議要典者魏氏之私書三案
自三案要典自要典也今為金石不刊之論者誠未深
思成謂翻即紛囂改亦多事惟有燬之而已帝命禮部
會詞臣詳議議上遂焚其板侍講孫之獬忠賢黨也聞
之詣閣大哭天下笑之元璠歷遷南京司業右中允四
年進右諭德充日講官進右庶子上制寔八策曰間挿
部曰繕京邑曰優守兵曰靖降人曰益寇餉曰儲邊才

曰莫輦轂曰嚴教育又上制虛八策曰端政今曰伸公
議曰宣義問曰一條教曰慮久遠曰昭激勸曰勵名節
曰假體貌其端政本悉規切溫體仁其伸公議則詆張
捷薦呂純如謀翻逆案事捷大怒上疏力攻元璐疏辨
帝俱不問八年遷國子祭酒元璐雅負時望位漸通顯
帝意嚮之深為體仁所忌一日帝手書其名下閣令以
履歷進體仁益恐會誠意伯劉孔昭謀掌戎政體仁餌
孔昭使攻元璐言其妻陳尚存而妾王冒繼配復封敗

禮亂法詔下吏部核議其同里尚書姜逢元侍郎王業
浩劉宗周及其從兄御史元珙咸言陳氏以過被出繼
娶王非妾體仁意沮會部議行撫按勘奏即擬旨云登
科錄二氏並列罪跡顯然何待行勘遂落職閒住孔昭
京營不可得遂以南京操江償之十五年九月詔起兵
部右侍郎兼侍讀學士明年春抵都陳制敵機宜帝喜
五月起拜戶部尚書兼翰林院學士仍充日講官祖制
浙人不得官戶部元璐辭不許帝眷元璐甚五日三賜

對因奏陛下誠用臣臣請得參兵部謀帝曰已諭樞臣
合與卿協計當是時馮元颺為兵部與元璐同志鈞考
兵食中外想望治平惟帝亦以用兩人晚而時事並不
可為左支右詘既已無可奈何故事諸邊餉司悉中差
元璐請改為大差兼兵部銜令清核軍伍不稱職者即
遣人代之先是屢遣科臣出督四方租賦元璐以為擾
民無益罷之而專責撫按戶部侍郎莊祖誨督勦寇餉
憂為盜劫遠避之長沙衡州元璐請令督撫自催毋煩

朝使自軍興以來正供之外有邊餉有新餉有練餉款目多黠吏易為奸元璐請合為一帝皆報可時國用益絀而災傷蠲免又多元璐計無所出請開贖罪例且令到官滿歲者得輸貲給封誥帝亦從之先是有崇明人沈廷揚者獻海運策元璐奏聞命試行乃以廟灣船六艘聽運進月餘廷揚見元璐元璐驚曰我已奏聞上謂公去矣何在此廷揚曰已去復來矣運已至元璐又驚喜聞上上亦喜命酌議乃議歲糧艘漕與海各相半行

焉十月命兼攝吏部事陳演忌元璐風魏藻德言於帝
曰元璐書生不習錢穀元璐亦數請解職十七年二月
命以原官專直日講踰月李自成陷京師元璐整衣冠
拜闕大書几上曰南都尚可為死吾分也勿以衣衾飲
暴吾屍聊志吾痛遂南向坐取帛自縊而死贈少保吏
部尚書謚文正

本朝賜謚文正

李邦華字孟闇吉水人受業同里鄒元標與父廷諫同

舉萬曆三十一年鄉試父子自相鏃礪布衣徒步赴公車明年邦華成進士授涇縣知縣有異政行取擬授御史值黨論初起朝士多詆顧憲成邦華與相拄遂指目邦華東林以是越三年而後拜命陳法祖用人十事曰內閣不當專用詞臣曰詞臣不當專守館局曰詞臣不當教習內書堂曰六科都給事中不當內外間阻曰御史陞遷不當概論考滿曰吏部乞假不當積至正郎曰關倉諸差不當專用舉貢任子曰調簡推知不當驟遷

京秩曰進士改教不當概從內轉曰邊方州縣不當盡用鄉貢疏上不報四十一年福王之藩已有期忽傳旨莊田務足四萬頃廷臣相顧愕眙計田數必不足則期將復更然無敢抗言爭之者邦華首疏諫廷臣乃相繼爭期得毋易巡視銀庫上祛弊十事中官不便格不行巡按浙江織造中官劉成死命歸其事於有司別遣中官呂貴錄成遺貲貴嗾奸民紀光詭稱機戶詣闕保留貴代成督造邦華極論二人交關作奸罪光疏不由通

政不下內閣以中旨行之邦華三疏爭皆不報是時神宗好貨中官有所進奉名為孝順疏中刺及之並劾左右大奄之黨貴者於是期滿久不得代四十四年引疾歸時羣小力排東林指鄒元標為黨魁邦華與元標同里相師友又性好別黑白或勸其委蛇邦華曰寧為偏枯之學問不作反覆之小人聞者益嫉之明年以年例出為山東叅議其父廷諫時為南京刑部郎中亦罷歸邦華乃辭疾不赴天啓元年起故官飭易州兵備明年

遷光祿少卿即還家省父四月擢右僉都御史代畢自
嚴巡撫天津軍府新立庶務草創邦華至極力振飭津
門軍遂為諸鎮冠進兵部右侍郎復還家省父四年夏
抵京奄黨大譁謂樞輔孫承宗以萬壽節入覲將清君
側之惡邦華寔召之乃立勒承宗還鎮邦華引疾去明
年秋奄黨劾削其官崇禎元年四月起工部右侍郎總
督河道尋改兵部協理戎政還朝召見旋知武會試事
竣入營故事冬至郊列隊扈蹕用軍八萬五千人至是

增至十萬有奇時方郊總督勲臣缺邦華兼攝其事所
設雲輦龍旌寶纛金鼓旗幟甲冑劍戟煥然一新帝悅
明年春幸學亦如之命加兵部尚書時戎政大壞邦華
先陳更操法慎揀選改戰車精火藥專器械責典守節
金錢酌兌馬練大礮九事京營故有占役虛冒之弊占
役者其人為諸將所役一小營至四五百人且有賣閒
包操諸弊虛冒者無其人諸將及勲戚奄寺豪強以蒼
頭冒選鋒壯丁月支厚餉邦華核還占役萬清虛冒千

三大營軍十餘萬半老弱故事軍缺聽告補率由賄得
邦華必親校非年壯力強者不錄自是軍鮮冒濫三營
選鋒萬壯丁七千餉倍他軍而疲弱不異邦華下令每
把總兵五百月自簡五人年必二十五以下力必二百
五十斤以上技必兼弓矢火礮月一解送補選鋒壯丁
之缺自是人人思奮三大營領六副將又分三十六營
官以三百六十七人計所用掾史皆積猾邦華按罪十
餘人又行一歲二考察之令自是諸奸為戢營馬額二

萬六千至是止萬五千他官公事得借騎總督協理及
巡視科道例有坐班馬不肖且折橐入錢營馬大耗邦
華首減已班馬三之一他官借馬非公事不得騎自是
濫借為希京營歲領太僕銀萬六千兩屯田籽粒銀千
六十兩犒軍製器胥徒工食取給焉各官取之無度歲
用不敷邦華建議先協理歲取千四百總督巡視遞節
減自是營帑遂裕營將三百六十聽用者稱是一官缺
請託紛至邦華悉杜絕行計日省成法每小營各置簿

月上事狀於協理以定殿最舊制三大營外復設三備
兵營營三千人餉視正軍而不習技擊益為豪家隱冒
邦華核去四千餘人又汰老弱千疏請歸併三大營不
另設由是戎政大釐倉場總督南居益言京營歲支米
百六十六萬四千餘石視萬厯四十六年增五萬七千
餘石宜減省邦華因上議軍以十二萬為額餉以百四
十四萬石為額歲省二十二萬有奇帝亦報可著為令
帝知邦華忠奏無不從邦華亦感帝知不顧後患諸失

利者銜次骨而怨謗紛然矣其年十月畿輔被兵簡精卒三千守通州二千援薊州自督諸軍營城外軍容甚壯俄有命邦華軍撤還守陴於是偵者不敢遠出聲息遂斷則請防寇賊緝間諜散奸宄禁偽言邦華自聞警衣不解帶捐貲造礮軍及諸火器又以外城單薄自請出守而諸不逞之徒乃搆蜚語入大內褒城伯李守錡督京營亦銜邦華扼己乘間詆譏邦華自危上疏陳隋歸命於帝會滿桂兵拒

大清兵德勝門外城上發大礮助桂悞傷桂兵多都察院都事張道澤遂劾邦華言官交章論列遂罷邦華閒住自是代者以為戒率因循姑息戎政不可問矣邦華前後罷免家居二十年父廷諫無恙十二年四月起南京兵部尚書定營制汰不急之將并分設之營謂守江南不若守江北防下流不若防上流乃由浦口厯滁全椒和相形勢繪圖以獻於浦口置沿江敵臺於滁設戍卒於池河建城垣於滁椒咽喉則築堡於藕塘和遭屠

戮請以隸之太平又請開府採石之山置哨太平之港大壘當塗間田數萬頃資軍儲徐州南北要害水陸交會請宿重兵設總督片檄徵調莫陵京萬全之勢皆下所司未及行以父憂去十五年冬起故官掌南京都察院事俄代劉宗周為左都御史都城被兵即日請督東南援兵入衛力疾上道明年三月抵九江左良玉潰兵數十萬聲言餉乏欲寄帑於南京艤艫蔽江東下留都士民一夕數徙文武大吏相顧愕眙邦華歎曰中原安

靜土東南一角耳身為大臣忍坐視決裂袖手局外而去乎乃停舟草檄告良玉責以大義良玉氣沮答書語頗恭邦華用便宜發九江庫銀十五萬餉之而身入其軍開誠慰勞良玉及其下皆感激誓殺賊報國一軍遂安帝聞之大喜陞見嘉勞邦華跪奏移時數詔起立溫語如家人中官屏息遠伏其後召對百官帝輒目注邦華云舊例御史出巡回道考覈邦華謂回道而後黜害政已多論罷巡按巡鹽御史各一人奉命考試御史黜

冒濫者一人追黜御史無顯過而先任推官著貪聲者
一人臺中始畏法十七年二月李自成陷山西邦華密
疏請帝固守京師倣永樂朝故事太子監國南都居數
日未得命又請定永二王分封太平寧國二府拱護兩
京帝得疏意動繞殿行且讀且歎將行其言會帝召對
羣臣中允李明睿疏言南遷便給事中光時亨以倡言
洩密糾之帝曰國君死社稷正也朕志定矣遂罷邦華
策不議未幾賊逼都城亟詣內閣言事魏藻德漫應曰

姑待之邦華太息而出已率諸御史登城羣奄拒之不得上十八日外城陷走宿文信國祠明日內城亦陷乃三揖信國曰邦華死國難請從先生於九京矣為詩曰堂堂丈夫兮聖賢為徒忠孝大節兮誓死靡渝臨危授命兮吾無愧吾遂投繯而絕贈太保吏部尚書謚忠文本朝賜謚忠肅

王家彥字開美莆田人天啓二年進士授開化知縣調蘭谿擢刑科給事中彈擊權貴無所避崇禎四年請釋

大學士錢龍錫於獄龍錫得減死請推行按月奏報例於四方獄囚得無久淹閩海盜劉香擾郡邑撫鎮追勦多失利朝議召募將大舉家彥言舊制衛所軍餼於官無別兵亦無別將統於各衛之指揮寨設號船聯絡呼應又添設遊擊等官雖支洋窮港戈船相望臣愚以今日策防海莫若復舊制勤訓練練則衛所軍皆勁卒不練雖添設召募兵猶驅市人而戰之糜餉擾民無益賊終不能盡時以為名言奉命巡青所條奏多議行先是

隆慶間太僕種馬額存十二萬五千邊馬至二十六萬
言者以民間最苦養馬所納馬又不足用議馬徵銀十
兩加草料銀二兩歲可得銀百四十四萬兩中樞楊博
持不可詔折其半而馬政始變萬歷九年議盡行改折
南寺歲徵銀二十二萬北寺五十一萬銀入厠寺而馬
政日弛家彥極陳其弊請改國初種馬及西番茶馬之
制又班軍舊額十六萬後減至七萬至是止二萬有奇
更有建議盡徵行糧月糧免其番上者家彥時巡京營

力陳不可且請免其工役盡歸行伍帝皆褒納其言遵
化鐵冶久廢奸民請開之家彥言有害無利復有請開
開化雲霧山以興屯者亦以家彥言而止屢遷戶科都
給事中軍興餉絀總督盧象昇有因糧加餉之議戶部
尚書侯恂請于未被寇之地士大夫家賦銀兩者加二
錢民間五兩以上者兩加一錢家彥言民賦五兩上者
率百十家成一戶非富民不可以朘削軍食不足畿輔
山東河南江北召買米豆輸天津至九十餘萬石吏胥

侵耗率數十萬家彥請嚴治帝並採納焉憂歸十二年
起吏科都給事中流寇日熾緣墨吏朘民民益走為盜
盜日多民生日蹙家彥上疏曰臣見秦晉之間饑民相
煽千百為羣其始率自一鄉一邑守令早為之所取周
官荒政十二而行之民何至接踵為盜盜何至潰裂以
極論者謂功令使然催科急者書上考督責嚴者號循
良不肖而墨者以東濕濟其饕餮一二賢明吏束於文
法展布莫由惟稍寬文網壹令撫綏盜之聚者可散散

者可不復聚又舊制捕蝗令吏部歲九月頒勘合於有司請寔意舉行帝皆納之擢大理丞進本寺少卿十五年遷太僕卿家彥向言馬政帝下兵部檄陝西督撫未能行至是四疏言馬耗之故請行官牧及金牌差發遺制且言課馬改折舊增至二十四萬兩已重困楊嗣昌不恤民復增三十七萬致舊額反逋不可不釐正帝手其疏語執政曰家彥奏皆善勅議行然軍興方亟不能盡舉也頃之擢戶部右侍郎都城被兵命協理戎政即

日登陴閱視內外城十六門雪夜攜一燈步巡城堞人
無知者翊日校勤惰將士皆服爭自勵初分守阜成門
後移安定門寢處城樓者半歲解嚴賜宴午門增秩一
等十七年二月廷推戶部尚書帝曰戎政非家彥不可
特留任賊逼京師襄城伯李國禎督京營又命中官王
德化盡督內外軍國禎發三大營軍城外守陴並少諸
軍既出城見賊輒降降卒反攻城城上人皆其儕並無
固志廷臣分門守家彥守安定門號令進止由中官沮

諸臣毋得登城又縋叛監杜勲上與密約而去帝手勅
兵部尚書張縉彥登城察視家彥從中官猶固拒示之
手勅問勲安在曰去矣秦晉二王欲上城家彥曰二王
降賊即賊也賊安得上頓足哭偕縉彥詣宮門請見不
得入黎明城陷家彥投城下不死自縊於民舍遭賊焚
殘其一臂僕收其餘體焉贈太子太保兵部尚書諡忠
端

本朝賜諡忠毅

孟兆祥字允吉山西澤州人也世籍交河舉於鄉九赴會試天啓二年始擢第除大理左評事崇禎初選吏部稽勲主事歷大選員外郎門生謁選請善地兆祥正色拒之其人悚然退進稽勲郎中歷考功忤權要貶行人司副稍遷光祿丞進少卿歷左通政太僕卿旋進通政使拜刑部右侍郎賊薄都城兆祥分守正陽門襄城伯李國禎統京營軍稽月餉不予士無固志城陷兆祥曰社稷已覆吾將安之自經於門下長子章明字綱宜甫

成進士兆祥揮之曰我死汝可去對曰君父大節也君
亡父死我何生為乃投繯於父之側兆祥妻呂章明妻
王相向哭既而曰彼父子死忠矣我二人獨不能死乎
皆自縊兆祥贈刑部尚書諡忠貞章明河南道御史諡
節愍

本朝賜兆祥謚忠靖章明貞孝

施邦曜字爾韜餘姚人萬厯四十一年進士不樂為吏
改順天府學教授歷國子博士工部營繕主事進員外

郎魏忠賢興三殿工諸曹郎奔走其門邦曜不往忠賢欲困之使拆北堂期五日適大風拔屋免譙責又使作獸吻倣嘉靖間製莫考夢神告之發地得吻嘉靖舊物也忠賢不能難遷屯田郎中稍遷漳州知府盡知屬縣奸盜主名每發輒得闔郡驚為神盜劉香李魁奇橫海上邦曜繫香母誘之香就禽魁奇援鄭芝龍事請撫邦曜言於巡撫鄒維漣討平之遷福建副使左參政四川按察使福建左布政使並有聲或餽之朱墨竹者姊子

在旁請受之曰不可我受之即彼得以乘間而嘗我我則示之以可欲之門矣性好山水或勸之遊峨媚曰上官遊覽動煩屬吏支應傷小民幾許物力矣其潔已愛民如此歷兩京光祿寺卿改通政司黃道周既謫官復逮下詔獄國子生涂仲吉上書訟之邦曜不為封進而大署其副封曰書不必上論不可不存仲吉劾邦曜邦曜以副封上帝見其署語怒下仲吉獄而奪邦曜官踰年起南京通政使入都陞見陳學術吏治用兵財賦四

事帝改容納焉出都三日命中使召還曰南京無事留
此為朕効力吏部推刑部右侍郎帝曰邦曜清執可左
副都御史時崇禎十六年十二月也明年賊薄近郊邦
曜語兵部尚書張縉彥檄天下兵勤王縉彥慢弗省邦
曜太息而去城陷趨長安門聞帝崩慟哭曰君殉社稷
矣臣子可偷生哉即解帶自經僕救之蘇恨曰是兒誤
我賊滿衢巷不得還邸舍望門求縊輒為居民所麾乃
命家人市信石雜燒酒即途中服之血迸裂而卒邦曜

少好王守仁之學以理學文章經濟三分其書而讀之
慕義無窮魯時生者里同年生也官庶吉士沒京師邦
曜手治含斂以女妻其子嘗買一婢命灑掃至東隅捧
篲凝視而泣怪問之曰此先人御史宅也時墮環茲地
不覺悽愴耳邦曜即分嫁女資擇士人歸之其篤於內
行如此贈太子少保左都御史謚忠介

本朝賜謚忠愍

凌義渠字駿甫烏程人天啓五年進士除行人崇禎二

年授禮科給事中知無不言三河知縣劉夢煒失餉銀

三千責償急自縊死有司責其家義渠言以金錢殞命

吏恐天下議朝廷重金意不在盜也帝特原之宜興溧

陽及遂安壽昌民亂焚掠巨室義渠言魏羽林軍焚領

軍張彝第高歡以為天下事可知日者告密漸啓藩國

悍宗入京越奏里閭小故叫閭聲寃僕豎侮家長下吏

箱上官市僧持縉紳此春秋所謂六逆也天下所以治

恃上下之分防維決裂即九重安所藉以提挈萬靈哉

義渠與溫體仁同里無所附麗給事中劉含輝劾體仁
擬旨失當被貶二秩義渠言諫官不得規執政失而委
申飭權於部院反得制言路大臣以攬權為奉旨小臣
以結舌為盡職將貽國家無窮憂兵部尚書張鳳翼敘
廢將陳壯猷功為給事中劉昌所駁昌反被斥義渠言
今上下盡相蒙彊場欺蔽為甚官方盡濫徇武弁倖功
為其中樞不職捨其大摘其細已足為言者羞辨疏一
入調用隨之自今奸弊叢生功罪倒置言者將杜口不

納三遷兵科都給事中東江自毛文龍後叛者接踵義渠言東島孤懸海外轉餉艱向仰給朝鮮今路阻絕不得食內潰可慮居無何衆果潰扶帥求撫義渠言請陽撫陰勦同惡必相戕及命新帥出海義渠言殲渠散黨宜速速則可圖功遲則更生他釁後其語皆驗義渠居諫垣九年建白多吏科給事中劉安行惡之以年例出義渠福建參政尋遷按察使轉山東右布政使所至有清操召拜南京光祿寺卿署應天尹事十六年入為大

理卿明年三月賊犯都城有旨召對趨赴長安門旦不
啓扉俄傳城陷還已得帝崩問負牆哀號首觸柱血被
面門生勸無死義渠厲聲曰爾當以道義相勗何姑息
為揮使去據几端坐取生平所好書籍盡焚之曰無使
賊手污也旦日具緋衣拜闕作書辭父已自繫奮身絕
吭而死年五十二贈刑部尚書謚忠清

本朝賜謚忠介

贊曰范景文倪元璐等皆莊烈帝腹心大臣所共圖社

稷者國亡與亡正也當時醜顏屈節僥倖以偷生者多
被刑掠以死身名俱裂貽詬無窮而景文等樹義烈於
千秋荷褒揚於

興代名與日月爭光以彼絜此其相去得失何如也



明史卷二百六十五



總校官編修臣吳紹濬

欽定四庫全書薈要

史部

明史卷二百六十八

六至

詳校官兵部主事雷純



欽定四庫全書薈要卷六千八百五十九 史部

明史卷二百六十六

大學士張廷玉等奉 敕修

傳第一百五十四

馬世奇

吳麟徵

周鳳翔

劉理順

汪偉

吳甘來

王章

陳良謨



陳純德

申佳允

成德

許直

金鉉

馬世奇字君常無錫人祖濂進士桂林知府世奇幼穎異嗜學有文名登崇禎四年進士改庶吉士授編修十一年帝遣詞臣分諭諸藩世奇使山東湖廣江西諸王府所至却饋遺還進左諭德父憂歸久之還朝進左庶子帝數召廷臣問禦寇策世奇言闖獻二賊除獻易除

闖難人心畏獻而附闖非附闖也苦兵也今欲收人心
惟敕督撫鎮將嚴束部伍使兵不虐民民不苦兵則亂
可弭帝善其言為下詔申飭時寇警日亟每名對諸大
臣無能畫一策世奇歸邸輒大息泣下曰事不可為矣
十七年三月城陷世奇方早食投筯起問帝安在東宮
二王安在或言帝已出城或言崩或又言東宮二王被
執世奇曰嗟乎吾不死安之其僕曰如太夫人何世奇
曰正恐辱太夫人耳將自經二妾朱李盛歸前世奇訝

曰若以我死將辭我去耶對曰聞主人盡節我二人來

從死耳世奇曰有是哉二妾竝自經世奇端坐引帛自

力縊乃死先是兵部主事成德將死貽書世奇以慷慨

從容二義質焉世奇曰勉哉元升吾人見危授命吾不

為其難誰為其難者與君攜手黃泉預訂斯盟無忘息

壤矣世奇修頤廣顙揚眉大耳砥名行居館閣有聲好

推獎後進為人廉父死蘇州推官倪長圩以贖鍰三千

助喪世奇辭曰蘇饑留此可用振座主周延儒再相世

奇同郡遠嫌除服不赴都及還朝廷儒已賜死親暱者
率避去世奇經紀其喪其好義如此贈禮部右侍郎謚
文忠

本朝賜謚文肅

吳麟徵字聖生海鹽人天啓二年進士除建昌府推官
禽豪猾捕劇盜治聲日聞父憂歸補興化府廉公有威
僚屬莫敢以私進崇禎五年擢吏科給事中請罷內遣
言古用內臣以致亂今用內臣以求治君之於臣猶父

之於子未有信僕從舍其子求家之理者又言安民之本在守令郡守廉縣令不敢貪郡守慈縣令不敢虐郡守精明縣令不敢叢脞宜倣宣宗用况鍾故事精擇而禮遣之重以璽書倣便宜久任民生疾苦吏治臧否使得自達天子時不能行麟徵在諫垣直聲甚著尋上疏乞假葬父既去貽言路公揭謂自言官積輕廟堂之上往往反其言而用之奸人窺見此旨明告君父目為朋黨自稱孤立下背公論上竊主權諸君子宜盡化沾沾

之意毋落其彀中使清流之禍更見明時居久之還朝
劾吏部尚書田維嘉贓污維嘉罷去再遷刑科給事中
丁繼母憂服闋起吏科都給事中時貨賂公行銓曹資
格盡廢麟徵上言限年平配固銓政之弊然舍此無以
待中材今遷轉如流不循資格巧者速化拙者積薪開
奔競之門無益軍國之計帝深然之十七年春推太常
少卿未幾賊薄京師麟徵奉命守西直門門當賊衝賊
詐為勤王兵求入中官欲納之麟徵不可以土石堅塞

其門募死士縋城襲擊之多所斬獲賊攻益急麟徵趨入朝欲見帝白事至午門魏藻德引麟徵手曰國家如天之福必無他虞旦夕兵餉集公何患遽為引之出遂還西直門明日城陷欲還邸已為賊所據乃入道旁祠作書訣家人曰祖宗二百七十餘年宗社一旦至此雖上有亢龍之悔下有魚爛之殃而身居諫垣無所匡救法當褫服殮用角巾青衫覆以單衾以志吾哀解帶自經家人救之甦環泣請曰待祝孝廉至一訣可乎許之

祝孝廉名淵嘗救劉宗周下獄與麟徵善者也明日淵
至麟徵慷慨曰憶登第時夢隱士劉宗周吟文信國零
丁洋詩今山河碎矣不死何為酌酒與淵別遂自經淵
為視含殮而去贈兵部右侍郎諡忠節

本朝賜諡貞肅方賊之陷山西也薊遼總督王永吉請
撤寧遠吳三桂兵守關門選士卒西行遏寇即京師警
旦夕可援天子下其議麟徵深然之輔臣陳演魏藻德
不可謂無故棄地二百里臣不敢任其咎引漢棄涼州

為證麟徵復為議數百言六科不署名獨疏昌言弗省
及烽烟徹大內帝始悔不用麟徵言旨下永吉永吉馳
出關徙寧遠五十萬衆日行數十里十六日入關二十
日抵豐潤而京師已陷矣城破八門齊啓惟西直門堅
塞不能通至五月七日集民夫發掘乃開

周鳳翔字儀伯浙江山陰人崇禎元年進士改庶吉士
授編修遷南京國子司業靈壁侯奴辱諸生鳳翔執付
法司歷中允諭德為東宮講官嘗召對平臺陳滅寇策

言論慷慨帝為悚聽軍需急議稅間架錢鳳翔曰事至此急宜收人心尚可括民財揺國勢耶亡何京師陷莊烈帝殉社稷有謠傳駕南幸者鳳翔不知帝所在趨入朝見魏藻德陳演侯恂宋企郊等羣入而賊李自成據御座受朝賀鳳翔至殿前大哭急從左楹門趨出賊亦不問歸至邸作書辭二親題詩壁間自經詩曰碧血九原依聖主白頭二老哭忠魂天下悲之去帝崩纔兩日也後贈禮部右侍郎謚文節

本朝賜諡文忠

劉理順字復禮杞縣人萬厯中舉於鄉十赴會試至崇禎七年始中式及廷對帝親擢第一還宮喜曰朕今日得一耆碩矣拜修撰益勤學非其人不與交十二年春畿輔告警疏陳作士氣矜窮民簡良吏定師期信賞罰招脅從六事厯南京司業左中允右諭德入侍經筵兼東宮講官楊嗣昌奪情入閣理順昌言於朝嗣昌奪其講官開封垂臨理順建議河北設重臣練敢死士為後

圖疏格不行嗣昌薛國觀周延儒迭用事理順一無所
附麗出溫體仁門言論不少徇賊犯京師急守卒缺餉
陰雨饑凍理順詣朝房語諸執政急請帑衆唯唯理順
太息歸捐家資犒守城卒僚友問進止正色曰存亡視
國尚須商酌耶城破妻萬妾李請先死既絕理順大書
曰成仁取義孔孟所傳文信踐之吾何不然書畢投繯
年六十三僕四人皆從死羣盜多中州人入唁曰此吾
鄉杞縣劉狀元也居鄉厚德何遽死羅拜號泣而去後

贈詹事謚文正

本朝賜謚文烈

汪偉字叔度休寧人寄籍上元崇禎元年進士十一年
由慈谿知縣行取帝以國家多故朝臣詞苑起家儒緩
不習吏事無以理紛禦變改舊例擇知推治行卓絕者
入翰林偉擢檢討給假歸還朝充東宮講官十六年賊
陷承天荆襄偉以留都根本之地江防綢繆疏言金
陵城週圍百二十里雖十萬衆不能守議者謂無守城

法有防江法賊自北來淮安為要自上游來九江為要
禦淮所以禦江守九江所以守金陵也淮有史可法屹
然保障九江一郡宜設重臣鎮之自是而上之至於武
昌下之至於太平采石浦口命南京兵部大臣建牙分
閫以接聲援而金陵之門戶固矣南京兵部有重兵而
無用操江欲用兵而無人宜使緩急相應而府尹府丞
之官重其權久其任聯百萬士民心以分兵部操江之
責帝嘉納之乃設九江總督又言兵額既虧宜以衛所

官舍餘丁補伍操練修治兵船以資防禦額餉不足暫
借鹽課漕米給之所條奏皆切時務明年三月賊兵東
犯偉語閣臣事急矣亟遣大僚守畿郡都中城守文自
內閣武自公侯伯以下各率子弟畫地守庶民統以紳
士家自為守而京軍分番巡徼以待勤王之師魏藻德
笑曰大僚守畿輔誰肯者偉曰此何等時猶較尊卑計
安危耶請以一劇郡見委藻德哂其早計未幾真定遊
擊謝加福殺巡撫徐標迎賊偉泣曰事至此乎作書寄

友人曰賊據真定奸人滿都城外郡上供絲粟不至諸
臣無一可支危亡者如聖主何平時誤國之人終日言
門戶而不顧朝廷今當何處伸狂喙耶賊薄都城守兵
乏餉不得食偉市餅餌以饋已而城陷偉歸寓語繼室
耿善撫幼子耿泣曰我獨不能從公死乎因以幼子屬
其弟衣新衣上下縫引刀自剄不殊復投繯遂絕時年
二十三偉欣然曰是成吾志移其屍於堂貽子觀書勉
以忠孝乃自經贈少詹事諡文烈

本朝賜諡文毅

吳甘來字和受江西新昌人父之才西安府同知甘來與兄泰來同舉鄉試崇禎改元甘來成進士授中書舍人後三年泰來亦成進士授南京太常博士五年甘來擢刑科給事中七年西北大旱秦晉人相食疏請發粟以振而言山西總兵張應昌等半殺難民以冒功中州諸郡畏曹變蛟兵甚於賊陛下生之而不能武臣殺之而不顧臣實痛之又言賞罰者將將大機權也陛下加

意邊陲賞無延格乃紅夷獻俘黔蜀爭功昌黎死守功
猶待勘急則用其死綏綏則束以文法且封疆之罰武
與文二內與外二士卒與將帥二受命建牙或速或逐
以封疆罪罪之而跋扈將帥罪狀已暴止於戴罪偏裨
不能令士卒將帥不能令偏裨督撫不能令將帥將聽
賊自來自去誰為陛下翦凶逆者憂歸服闋起吏科進
兵科右給事中乞假歸十五年起厯戶科都給事中中
外多故荆襄數郡賊未至而撫道諸臣率稱護藩以去

甘來曰若爾則是棄地方而逃也城社人民誰與守者
乃上疏曰天子衆建親親將使屏藩帝室故曰宗子維
城乃烽火纔傳一朝委去以為民望而諸臣猶哓哓以
擁衛自功掩其失地之罪是維城為可留可去之人名
都為可守可棄之土撫道為可有可無之官功罪不明
賞罰不著莫此為甚疏入帝大嘉歎一日帝詰戶部尚
書倪元璐餉額甘來曰臣科與戶曹表裏餉可按籍稽
臣所慮者兵聞賊而逃民見賊而喜恐非無餉之患而

無民之患宜急輕賦稅收人心帝領之甘來遘疾連請
告會帝命編修陳名夏掌戶科甘來喜得代不數日賊
薄都城時奉來官禮部員外郎矣甘來屬兄歸事母而
自誓必死明日城陷有言駕南幸者甘來曰主上明決
必不輕出乃疾走皇城不得入返檢几上疏草曰當賊
寇縱橫徒持議論無益豪末盡取焚之毋釣後世名遂
投繯死贈太常卿諡忠節

本朝賜諡莊介

王章字漢臣武進人崇禎元年進士授諸暨知縣少孤
母訓之嚴及為令祖帳歸少暮母訶跪予杖曰朝廷以
百里授酒人乎章伏地不敢仰視親友為力解乃已治
諸暨有聲甫半歲以才調鄞縣諸暨民與鄞民爭挽章
至相諱治鄞益有聲數注上考十一年行取入都時有
考選翰林之命行取者爭奔競給事中陳啓新論之帝
怒命吏部上訪冊罪廷臣濫徇者尚書姜逢元王業浩
給事中傅元初御史禹好善等六人閒住給事中孫晉

等十一人貶二秩視事吏部尚書田維嘉等乃請先推部曹凡推二十二人章與焉授工部主事章及任濬涂必泓李嗣京欲疏辨憚為首獲罪李士淳者耄矣四人不告而首其名士淳知之懼且怒與章等大詬而帝知維嘉有私詔許與考又以為首者必良士也擢士淳編修章等皆御史章上疏請罷內操寬江南逋賦明年出按甘肅持風紀飭邊防西部寇莊浪巡撫急徵兵章曰貧寇索食耳策馬入其帳衆羅拜乞降乃稍給之食兩

河旱章檄城隍神御史受錢或戕害人神殛御史母虐
民神血食茲土不能請上帝蘇一方當奏天子易爾位
檄焚雨大注邊卒貸武弁金償以賊首武弁以冒功坐
是數召邊釁章著令非大舉毋得以零級冒功劾罷巡
撫劉鎬貪情又所部十道監司劾罷其四母憂歸
服闋還朝巡視京營按籍額軍十一萬有奇喜曰兵至
十萬猶可為也及閱視半死者餘冒伍億甚矢折刀缺
聞礮聲掩耳馬未馳輒墮而司農缺餉半歲不發章屢

疏請帑不報踰月城陷真定京師大震襄城伯李國禎
發營卒五萬營城外章與給事中光時亨守阜成門城
內外堞凡十五萬四千有奇三堞一卒三月初登陴閱
十日始一還邸櫛沐易新衣冠家人大駭章不應賊傳
城下章手發二礮賊少却頃之各門礮聲絕時亨攝章
走章厲聲曰事至此猶惜死耶時亨曰死此與士卒何
別入朝訪上所在不獲則死死未晚也章從之與時亨
竝馬行俄賊突至呼下馬時亨倉皇下馬跪章馳鞭不

顧叱曰吾視軍御史也誰敢犯賊刺章股墮章罵曰逆賊勤王兵且至我死爾滅不旋踵矣賊怒攢槊刺殺章而去抵募家人覓屍猶一手據地坐張口怒目勃勃如叱賊狀妻姜在籍聞之一慟而絕贈大理寺卿謚忠烈本朝賜謚節愍次子之棧仕閩為職方主事亦死難陳良謨字士亮鄞人崇禎四年進士授大理推官初名天工莊烈帝處事上帝詔曰臣名天者悉改之乃改良謨在職六年兩注上考行取陞見擢御史十二年出按

四川期滿當代再留任時流寇大入蜀詔良謨專護蜀

王巡撫邵捷春專辦賊良謨飭守具堅壁清野賊犯成
都遣將據要害為犄角一再戰賊潰奔帝聞賊擾蜀下
詔責良謨已聞其善守禦乃優旨賜銀幣及還朝賊勢
益迫所規畫率不行而京師陷矣良謨嘗夢拜文天祥
於堂下天祥揖之上曰公與予先後一揆何下拜為覺
而異之及是城陷良謨方移疾卧邸中一慟幾絕自是
水漿不入口或勸良謨無死不答謂邑子李天葆曰吾

為國死義不顧家惟是母老先君莫葬繼享未定湏一言耳因賦詩付天祿未幾聞帝崩煤山大慟曰主上不冕服臣子敢具冠帶乎吾巾褻安所得明巾天祿以巾進良謨著巾藍便服起入戶妾時氏隨之遂與妾俱自縊死時氏京師人年十八良謨踰五十無子以禮納之侍良謨百三日耳良謨既卒其族人以其兄之子久樞為之後未幾久樞亦卒良謨竟無後贈太僕卿謚恭愍本朝賜謚恭潔

陳純德字靜生零陵人爲諸生以學行稱嘗夜泊洞庭
爲盜窘躍出墮水再躍入洲渚比曉坐蘆葦中去泊舟
數十丈崇禎十三年成進士年已六十矣莊烈帝召諸
進士咨以時事純德奏稱旨立擢御史巡按山西七月
部內嚴霜民凍餒純德上疏請恤因陳抽練之弊言兵
抽則人失故居無父母妻子之依田園邱壠之戀思歸
則逃逢敵則潰抽餘者既以餉薄而安於無用抽去者
又以遠調而不樂爲用伍虛而餉仍在不歸主帥則歸

偏裨樂其逃而利其餉凡籍以營求遷秩皆是物也精神不以束伍而以侵餉厚餉不以養士而以求官伍虛則無人安望其練餉糜則愈缺安望其克此今日行間大弊也帝不能用還朝督畿輔學政將出按部都城陷賊下令百官以其日入見衆攝純德入還邸慟哭遂自經京山人秦嘉系買地葬之永定門外立石表墓焉贈太僕卿諡恭節

申佳允字孔嘉永年人崇禎四年進士授儀封知縣縣

故多盜佳允嚴保甲法盜無所容霪雨河決艤舟怒濤
中塞其口捕大猾置之法以才調杞縣八年賊掃地王
率萬人來攻城土垣多圯佳允募死士擊走賊因覓其
城唐王聿鍵勤王將抵開封諸大吏惴恐集議曰留之
不聽行守土者且得罪佳允曰惟周王可留之衆稱善
用其計治行卓異擢吏部文選主事上備邊五策進考
功員外郎佐京察大學士薛國觀傾少詹事文安之安
之佳允座主也事連佳允左遷南京國子博士久之遷

大理評事進大僕丞閱馬近畿聞李自成破居庸歎曰
京師不守矣君父有難焉逃死馳入都遍謁大臣為畫
戰守策皆不省貽子涵光書曰行已曰義順數曰命義
不可背也命不可違也天下事莫不壞於貪生而畏死
死於疾死於利死於刑戮於房幃於鬪戰均死也死數
者不死君父蓋亦不善用死矣今日之事君父之事死
義也猶命也我則行之京師陷冠帶辭母策馬至王恭
廠從者請易服以避賊佳允曰吾起微賤食祿十三年

國事至此敢愛死乎兩僕環守不去給之曰吾不死也
我將擇善地焉下馬旁見灌畦巨井急躍入僕號呼欲
出之佳允亦呼曰告太安人有子作忠臣勿過傷也遂
死年四十二贈太僕少卿謚節愍

本朝賜謚端愍

成德字元升霍州人依舅氏占籍懷柔崇禎四年進士
除滋陽知縣性剛介清操絕俗疾惡若讐文震孟入都
德郊迎執弟子禮語刺溫體仁體仁聞而恨之兗州知

府增餉額德固爭又嘗捕治其牙爪吏知府怒讒於御史禹好善好善體仁客也誣德貪虐逮入京滋陽民詣闕訟寃震孟在閣亦為之稱枉德道中具疏極論體仁罪而震孟已被體仁擠而去之好善再劾德言其疏出震孟手帝不之寃德母張伺體仁長安街繞輿大罵拾瓦礫擲之體仁恚疏聞於朝詔五城御史驅逐移德鎮撫獄掠治杖六十午門外戍邊坐贓六千有奇而給體仁校尉五十人護出入德居戍所七年用御史唐兆恒

薦起如臯知縣尋擢武庫主事以母老辭不允乃就道
至則上言年來中外多故居官者爵祿迷心廉恥道喪
陛下御極十七年何仗節死義之寥寥也宋臣張栻有
言仗節死義之臣當於犯顏諫諍中求之夫犯顏諫諍
何難在朝廷養之而已表厥宅里所以伸忠臣孝子於
生前殊厥井疆所以誅亂臣賊子於未死苟死敵者無
功則媚敵者且無罪死賊者褒揚不亟則從賊者恬而
不知畏也未幾城破不知帝所在旁皇廳事已趨至午

門見兵部尚書張縉彥自賊所出德以頭觸縉彥胸且
詈之俄聞帝崩痛哭持鷄酒奔東華門奠梓宮於茶棚
之下觸地流血賊露刃脅之不為動奠畢歸家有妹年
二十餘未嫁德顧之曰我死汝何依妹曰兄死妹請前
德稱善哭而視其縊入別其母哭盡哀出而自縊母見
子女皆死亦投繯死先是懷柔城破德父文桂遇害家
屬盡沒妻劉在京以徵德賊急憂悸死至是又闔門死
難惟幼子先寄友人家獲存贈德光祿卿謚忠毅

本朝賜諡介愍

許直字若魯如臯人崇禎七年成進士出文震孟之門以名節自砥除義烏知縣母憂歸哀毀骨立終喪蔬食寢樞旁補廣東惠來縣用清望徵授吏部文選主事進考功員外郎賊薄都城約同官出資饗士為死守計城陷賊令百官報名直曰身可殺志不可奪有傳帝南狩者直將往從見賊騎塞道出門輒返曰四方兵戈駕焉往國亂不匡君危無濟我何生為已知帝崩一慟幾絕

客以七十老父為解直曰不死辱及所生賦絕命詩六章闔戶自經越旦視之神氣如生贈太僕卿謚忠節本朝賜謚忠愍直有族子德溥者在南聞莊烈帝崩大哭數日揚州陷又哭數日每獨坐輒慟哭食必以崇禎錢一枚置几上祭而後食食已復哭又刺其兩臂曰生為明臣死為明鬼事發死西市

金鉉字伯玉武進人占籍順天之大興祖汝升南京戶部郎中父顯名汀州知府鉉少有大志以聖賢自期許

年十八舉鄉試第一明年崇禎改元成進士不習為吏
改揚州府教授日訓諸生闡濂洛正學燕居言動俱有
規格諸生嚴憚之歷國子博士工部主事帝方銳意綜
核疑廷臣朋黨營私度支告匱四方亟用兵餉不敷遣
中官張彝憲總理戶工二部建專署檄諸曹謁見禮視
堂官鉉恥之再疏爭不納乃約兩部諸僚私謁者衆唾
其面彝憲愠甚鉉當權稅杭州辭疾請假彝憲撫火器
不中程劾鉉落職鉉杜門謝客躬爨以養父母十七年

春始起兵部主事巡視皇城聞大同陷疏曰宣大京師北門大同陷則宣府危宣府危大事去矣請急撤回監宣中官杜勛專任巡撫朱之馮勛二心僨事之馮忠懇可屬大事不報未幾勛以宣府降賊賊殺之馮烽火偏京師鉉奔告母母可且逃匿兒受國恩義當死鉉母章時年八十餘矣呵曰爾受國恩我不受國恩乎廡下井是我死所也鉉哭而去城破趨入朝宮人紛紛出知帝已崩解牙牌拜授家人即投金水河家人爭前挽之鉉

怒口嚙其臂得脫遂躍入水水淺濡首泥中乃絕母聞
即投井妾王隨之皆死賊踞大內踰月始出金水河冠
袍泛泛見水上內官羣指之曰此金兵部也弟鏞辨其
屍驗網巾環得鉉首歸合以木身如禮而殮事竣鏞自
經後贈太僕少卿謚忠節

本朝賜謚忠潔自范景文至鉉二十有一人皆自引決
其他自成國公朱純臣大學士魏葆德以下率委蛇見
賊賊以大僚多誤國槩囚繫之庶官則或用或否用者

下吏政府銓除不用者諸偽將榜掠取其貲大抵降者
十七刑者十三福王時以六等罪治諸從逆者而文武
臣殉難並予贈廕祭葬且建旌忠祠於都城焉曰正祠
文臣祀景文以下二十人及大同巡撫衛景瑗宣府巡
撫朱之馮布衣湯文瓊諸生許琰四人曰正祀武臣祀
新樂侯劉文炳惠安伯張慶臻襄城伯李國楨駙馬都
尉鞏永固左都督劉文耀山西總兵官周遇吉遼東總
兵官吳襄七人曰正祀內臣祀太監王承恩一人曰正

祀婦人祀烈婦成德母張氏金鉉母張氏汪偉妻耿氏
劉理順妻萬氏妾李氏馬世奇妾朱氏李氏陳良謨妾
時氏吳襄妻祖氏九人曰附祀文臣祀進士孟章明及
郎中徐有聲給事中顧鉉彭瑄御史俞志虞總督徐標
副使朱廷煥七人曰附祀武臣祀成國公朱純臣鎮遠
侯顧肇迹定遠侯鄧文明武定侯郭培民陽武侯薛濂
永康侯徐錫登西寧侯宋裕德懷寧侯孫維藩彰武伯
楊崇猷宣城伯衛時春清平伯吳遵周新建伯王先通

安鄉伯張光燦右都督方履泰錦衣衛千戶李國祿十
五人曰附祀內臣祀大監李鳳翔王之心高時明褚憲
章方正化張國元六人有司春秋致祭然顧鉉彭瑄俞
志虞輩特為賊拷死諸侯伯亦大半以兵死而郎中周
之茂員外郎甯承烈中書宋天顯署丞于騰雲兵馬指
揮姚成知州馬象乾皆以不屈死顧未邀贈卹也徐有
聲字聞復金壇人登鄉薦崇禎十三年特擢戶部主事
厯員外郎郎中督餉大同城陷被執不屈死福王時贈

太僕少卿徐標字準明濟寧人天啟五年進士崇禎時
歷官淮徐道參議十六年二月超擢右僉都御史巡撫
保定陞見請重邊防擇守令用車戰禦敵招流民墾荒
帝深嘉之李自成陷山西警曰逼加標兵部侍郎總督
畿南山東河北軍務仍兼巡撫移駐真定以遏賊無何
賊遣使諭降標毀檄戮其使賊別將掠畿輔真定知府
邱茂華移妻孥出城標執茂華下之獄中軍謝加福伺
標登城畫守禦策鼓衆殺之出茂華於獄數日而賊至

以城降福王時贈標兵部尚書朱廷煥單縣人崇禎七年進士除工部主事厯知廬州大名二府即以兵備副使分巡大名十七年賊逼畿輔廷煥嚴守備賊傳檄入城怒而碎之三月四日賊來攻軍民皆走城遂陷被執不屈死福王時贈右副都御史周之茂字松如黃麻人崇禎七年進士厯官工部郎中服闋需次都下賊搜得之迫使跪不屈折其臂而死甯承烈字養純大興人舉於鄉厯魏縣教諭戶部司務進本部員外郎筦太倉銀

庫城陷自經於官廨宋天顯松江華亭人由國子生官
內閣中書舍人為賊所獲自經于騰雲順天人為光祿
署丞賊至語其妻曰我朝臣汝亦命婦可污賊耶夫婦
並服命服從容投繯死姚成字孝威餘姚人由禮部儒
士為北城兵馬司副指揮城陷自縊死馬象乾京師人
舉於鄉官濮州知州方里居賊入率妻及子女五人並
自縊至若御史馮垣登兵部員外郎鄭逢蘭行人謝于
宣皆拷死郎中李逢申拷掠久之逼令縊死與鉉琯志

虞皆獲贈太僕少卿而垣登于宣至謚忠節行取知縣
鄒逢吉拷死贈太僕寺丞時南北阻絕皆未能核實也
湯文瓊許瑛事載忠義傳

贊曰傳云君子居其位則思死其官夫忠貞之士臨危
授命豈矯厲一時邀名身後哉分誼所在確然有以自
持而不亂也馬世奇等皆負貞亮之操勵志植節不欺
其素故從容能蹈義如出一轍可謂得其所安者矣

明史卷二百六十六

欽定四庫全書

明史卷二百六十六考證

吳麟徵傳麟徵在諫垣直聲甚著

臣

方煒按是時河

決蘇家嘴淮陽諸邑悉被災督漕侍郎李時問不能治麟徵極論其罪吏部郎中牟道行左遷太平知府麟徵言道行貪並不當守郡建安令徐爾驛用賄首薦牘麟徵成其奸並劾湖廣巡按白士麟廣建生祠罪諸人多獲譴同官章正宸以劾王應熊下獄麟徵

論救之見明紀事本末傳未詳載謹附識

吳麟徵傳起吏科都給事中

臣方煒按麟徵掌吏科

時吳昌時以年例出言路十人於外麟徵與御史祁

彪佳劾其挾勢弄權見孫承澤春明夢餘錄謹附識

吳麟徵傳祝孝廉名淵

臣方煒按淵海寧人乙酉閏

六月

大清兵平杭州淵與行人陸培舉人周宗彞及弟啟琦

進士俞士良死之見浙江通志謹附識

吳麟徵傳薊遼總督王永吉請撤寧遠吳三桂兵守關
門選士卒西行遇寇即京師警旦夕可援天子下其
議麟徵深然之

臣

方煒按永吉之請在十七年二

月帝始以為然今本兵具奏演言錦州告警寧遠必
不可調帝召羣臣會議不決獨成國公朱純臣戶部
尚書倪元璐刑部侍郎金之俊以為當調而麟徵爭
尤力退復獨疏言之演復請下永吉等議永吉等皆
以撤兵為便帝乃俞之而已無及矣見明紀事本末

此作麟徵獨疏昌言帝弗省小異謹附考

劉理順傳疏陳作士氣矜窮民簡良吏定師期信賞罰

招脅從六事

臣

方煒按理順疏言六事帝下所司

議行因蠲畿輔山東逋賦見孫承澤春明夢餘錄謹

附識

吳甘來傳擢刑科給事中

臣

方煒按戶部尚書畢自

嚴以失察行取知縣鄭友元逋項被責飾辨觸帝怒
下獄御史李右讜疏救不納甘來抗疏論救乃釋之

見自嚴本傳謹附識

王章傳時亨倉皇下馬跪章持鞭不顧叱曰吾視軍御史也誰敢犯

臣

方煒按福王立時亨奔南京與周

鍾武愷皆以從逆伏誅見明紀事本末謹附識

王章傳子之棧仕閩為職方主事亦死難

臣

方煒按

王之棧

賜謚另載卷末謹識

陳良謨傳流寇大入蜀

臣

方煒按是時督師楊嗣昌

曰是以蜀為壑也乃躬閱關隘飭將吏為堵勦計見綏寇紀畧謹附識

陳純德傳還邸慟哭遂自經

臣方煒按陳純德

賜謚另載卷末謹識

申佳允傳上備邊五策

臣方煒按佳允所上備邊五

策明紀事本末諸書皆無可考謹識

成德傳德道中具疏極論體仁罪而震孟已被體仁擠而去之

臣方煒按是時給事中許譽卿劾體仁納

賄庇私會謝陞以營求北缺劾譽卿體仁擬旨降調而故重其詞帝果削譽卿籍震孟與何吾騶力爭體仁遂訐奏震孟言官罷斥為至榮語帝大怒逐震孟並罷吾騶見孫承澤春明夢餘錄謹附識

成德傳別其母哭盡哀出而自縊臣方煒按德殉難時繼妻霍氏及男李成龍皆自縊死一子方六歲德撲殺之乃自盡見畿輔通志謹附識

成德傳先是懷柔城破德父文桂遇害臣方煒按成

文桂

賜祀忠義祠謹識

許直傳有族子德溥者

臣方煒按許德溥

賜祀忠義祠謹識

金鉉傳始起兵部主事

臣方煒謹按是時任車駕司

主事見明紀事本末傳未詳載謹附識

金鉉傳事竣鉉自經

臣方煒按金鉉

賜祀忠義祠謹識

金鉉傳宣城伯衛時春

臣

方煒按時春崇禎時掌後

府京城陷懷鐵券闔門十七人皆赴井死功臣世表
及衛青傳皆同而表誤春為泰謹附考

金鉉傳而郎中周之茂員外郎寧承烈中書宋天顯署
丞于騰雲兵馬指揮姚成知州馬象乾皆以不屈死
臣方煒按徐有聲俞志虞徐標朱廷煥周之茂寧
承烈宋天顯于騰雲馬象乾

賜謚俱另載卷末謹識

金鉉傳姚成字孝威

臣方煒按姚成

賜祀忠義祠謹識

金鉉傳姚成字孝威

臣方煒按是時中書舍人滕之

所阮文貴經歷張應選咸投御河死經歷施溥仰藥
死儒士張世禧二子懋賞懋官自經死又東宮侍衛
周鏡都指揮王國興指揮同知李若珪順天府知事
陳貞達皆自經死千戶高文采守宣武門城陷一家
十七人皆自殺見紀事本末謹附識

欽定四庫全書

附明史卷二百六十六考證後

乾隆四十一年

賜謚諸臣

王之栻 徐 標 楊崇猷

以上通謚忠節

陳純德 俞志虞 顧肇迹 鄧文明 薛 漁

宋天顯 宋裕德 吳遵周 方履泰 李國祿

甯承烈 于騰雲 馬象乾

以上通謚忠愍

欽定四庫全書薈要卷六千八百六十

史部

明史卷二百六十七

大學士張廷玉等奉 敕修

列傳第一百五十五

馬從聘

耿蔭樓

張伯鯨

宋 玫

族叔應亨

陳

范淑泰

高名衡

王顯際趙士驥等

徐 汧

楊廷樞

鹿善繼

薛一鶚

馬從聘字起莘靈壽人萬曆十七年進士授青州推官擢御史勛衛李宗城冊封平秀吉逃歸從聘言其父言恭不當復督戎政不從出理兩淮鹽課言近日泰山崩離圻者里餘由開礦斷地脉所致當速罷不報奸人田應壁請掣賣沒官餘鹽助大工帝遣中官魯保督之從聘極陳欺罔狀不從還朝改按浙江又按蘇松請免增蘇松常鎮稅課亦不報以久次擢太僕少卿拜右僉都御史巡撫延綏失事奪俸既而有擣巢功未敘引疾歸

加兵部右侍郎家居凡二十餘年終熹宗世不出崇禎
十一年冬

大清破靈壽從聘年八十有二矣謂其三子曰吾得死
所矣又曰吾大臣義不可生汝曹生無害也三子不從
從聘縊三子皆縊贈兵部尚書謚介敏官其一子耿蔭
樓從聘同邑人也字旋極天啟中任臨淄知縣久旱囚
服暴烈日中哭於壇雨立澍攝壽光禱雨如臨淄崇禎
中入為兵部主事調吏部歷員外郎乞假歸城破偕子

參並死之贈光祿少卿

張伯鯨字繩海江都人萬厯四十四年進士厯知會稽
歸安鄞三縣天啟中大計調補盧氏崇禎二年稍遷戶
部主事出督延寧二鎮軍儲自黃甫川西抵寧夏千二
百里不產五穀芻粟資內地賀蘭山沿黃河漢唐二渠
東抵花馬池素沃野亦荒蕪甚伯鯨疏陳其狀為通商
惠工轉菽麥又倣邊商中鹽意立官市法以招之軍民
稱便大盜起延綏擢伯鯨兵備僉事轄榆林中路擊破

賀思賢斬一座城金翅鵬敗套寇於長樂堡巡撫陳奇
瑜上其功詔進三階為右參政仍視兵備事七年春奇
瑜遷總督遂擢伯鯨右僉都御史代之督總兵王承恩
等分道擊破察罕部長及套寇於雙山魚河二堡斬首
三百明年以拾遺論罷尋論延綏功詔起用蔭子錦衣
千戶十年秋楊嗣昌議大舉討賊遣戶部一侍郎駐池
州專理兵食帝命傅淑訓明年淑訓憂去即家起伯鯨
代之如淑訓官又明年熊文燦撫事敗嗣昌自出督事

移伯鯨襄陽文燦之被逮也言勦餉不至者六十餘萬
伯鯨坐貶秩十五年召為兵部左侍郎明年尚書馮元
颺在告伯鯨攝部事召對萬歲山疾作中官扶出遂乞
休又明年京城陷微服遁還福王立於南京伯鯨家居
不出久之揚州被圍與當事分城守城破自經死

宋玫字文玉萊陽人父繼登萬厯三十二年進士厯官
陝西右參議天啓五年大計謫官玫即以是年偕族叔
應亨同舉進士玫授虞城知縣應亨得清豐崇禎元年

玫兄琮亦舉進士知祥符而玫以才調繁杞縣三人壤地相接並治有聲應亨遷禮部主事玫亦擢吏科給事中嘗疏論用人謂陛下求治之心愈急則浮薄喜事之人皆飾詭而釣竒陛下破格之意愈殷則巧言孔子之徒皆乘機而鬪捷衆聽其言時應亨已改吏部累遷稽勲郎中落職歸玫方除母喪起故官厯刑科都給事中請熟審槩行於天下又言獄囚稽滯瘐死與刑死幾相半宜有矜釋帝採納之遷太常少卿歷大理卿工部右

侍郎玫父繼登已久廢至是為浙江右參政大學士周

延儒客盛順者為浙江巡撫熊奮渭營內召果擢南京

戶部侍郎繼登父子信之十五年夏廷推閣臣順為玫

營推甚力會詔令再推玫與焉帝已中流言疑諸臣有

私比入對玫冀得帝意侃侃數奏帝發怒叱退之與吏

部尚書李日宣等並下獄日宣等遣戌玫除名順乃驚

竄閏十一月臨清破應亨與知縣陳顯際謀城守應亨

以城北庫薄出千金建甕城浹旬而畢玫及邑人趙士

驥亦出貲治守具無何

大清兵薄城城上火礮矢石並發圍乃解明年二月復至城遂破攻應亨顯際士驥並死之顯際真定人士驥官中書舍人並起家進士攻應亨有文名沈迅亦萊陽人也崇禎四年舉進士歷知新城蠡二縣與膠州張若騏同年友善十一年行取入都帝以吏部考選行私親策諸臣迅若騏並得刑部主事兩人大恚恨結楊嗣昌得改兵部其年冬畿輔被兵迅請於廣平河間定州蠡

縣各設兵備一人又請以天下僧人配尼姑編入里甲

三丁抽一可得兵數十萬他條奏甚多章下兵部嗣昌
盛稱迅言可用乃命為兵科給事中迅欲自結於帝數
言事皆中旨當是時軍興方棘廷臣言兵者即以為知
兵大者推督撫小者兵備一當事任罪累立至於是上
下諱言兵章奏無敢及者迅極言其弊乞敕廷臣五日
內陳方畧帝即從其言迅考選時為掌河南道御史王
萬象所抑因事劾罷萬象勢益張與若騏盡把持山東

事會順天府丞戴澳誣劾平遠知縣王凝命嘉興推官
文德翼貪迅上疏頌二人廉能澳下吏削籍迅累遷禮
科都給事中陳新甲主款迅面斥其非廷辨良久又言
楊嗣昌死有餘戮借久案以邀功陳新甲負罪不遑移
邊勞而錄蔭非論功議罪法帝是其言迅本由嗣昌進
隨衆詆毀時論訾薄之尋以保舉高斗光為鳳陽總督
不當謫國子博士乞假歸及新甲誅命追論兵科不糾
發罪吏部上迅名帝曰迅御前駁議朕猶識之可復故

官未赴而京師陷迅家居與弟迓設砦自衛迓短小精悍馬上舞百斤鐵椎兄弟率里中壯士捕勦土寇畧盡大清兵至破砦迅闔門死之若騏劾黃道周以媚嗣昌歷職方郎中新甲遣赴寧錦督戰覆洪承疇等十餘萬軍獨渡海逃還論死繫獄李自成陷都城出降

范淑泰字通也滋陽人崇禎元年進士授行人五年冬擢工科給事中上疏陳刑獄繁多乞敕刑官疏理帝褒納之流賊犯河南追論先任巡撫樊尚璟罪劾總兵鄧

玘淫掠狀時中官張彝憲言天下逋賦至一千七百餘萬請遣科道官督徵帝大怒責撫按回奏淑泰言民貧盜起逋賦難以督追不從給事中莊鼐獻章正宸建言下吏抗疏救之吏部張捷薦逆黨呂純如淑泰極論其謬并論大學士王應熊朋比行私劾捷徇應熊意用其私人王維章撫蜀言維章官西寧坐加徵激變落職閒住捷朦朧啟事明肆奸欺帝責捷自陳捷詆淑泰黨同伐異帝不問時皇陵被毀巡撫楊一鵬得罪應熊以座

主故力庇之淑泰發其停匿章奏狀帝亦不究淑泰乃

撫應熊納賄數事上之應熊捐貲助陵工淑泰又劾其

召寇庇奸帝責以挾私求勝終不納十一年冬上疏言

今以措餉故至搜括借助即行之而得再有兵事能復

行乎治不規其可久徒倉皇於補救之術非所以為忠

也陛下方以清節風天下而乃條敘百官金錢於多寡

之間是教之貪也至借貸之說尤不可行京師根本重

地通者物力困竭富商大賈大半旋歸內不安何以攘

外乞立寢其說又言強兵莫如行法今之兵索餉則強
赴敵則弱殺良冒功則強除暴救民則弱請明示法令
諸將能用命殺賊者立擢為大將否則死無赦毋以降
級戴罪徒為不切身之痛癢帝是其言十五年遷吏科
典浙江鄉試事竣還家十二月

大清兵圍兗州淑泰竭力固守城破死之詔贈太僕少
卿官一子

高名衡字仲平沂州人崇禎四年進士除如臯知縣以

才調興化徵授御史十二年出按河南明年期滿留再
巡一年十四年正月李自成陷洛陽乘勝遂圍開封巡
撫李仙風時在河北名衡集衆守周王恭枵發庫金百
萬兩募死士殺賊烝米屑麥執爨以餉軍凡七晝夜仙
風馳還開封副將陳永福背城而戰斬首二千游擊高
謙夾擊斬首七百賊解去仙風既還與名衡互訐奏帝
以陷福藩罪詔逮仙風以襄陽兵備副使張克儉代克
儉已前死難即擢名衡右僉都御史代之以永福充總

兵官都督僉事鎮守河南當是時賊連陷南陽鄧汝十
餘州縣唐徽二王遇害名衡不能救開封周郎圖書文
物之盛甲他藩士大夫璽富蓄積充物自成攻之不能
克然欲得而甘心焉歲暮賊再圍開封永福射自成中
其左目礮殪上天龍等自成怒急攻之開封故宋汴都
金帝南遷所重築也厚數丈內堅緻而外疏十五年正
月賊用火藥放迸火發即外擊甃瓠飛鳴賊騎皆糜爛
自成大驚會楊文岳援兵亦至乃解圍去西華郾襄睢

陳太康高邱寧陵考城俱陷四月復至開封圍而不攻
欲坐困之六月詔釋故尚書侯恂於獄命督保定山東
河北湖北軍務並轄平賊等鎮援勦官兵拔知縣蘇京
王漢王燮為御史詔蘇京監延寧甘固軍趣孫傅庭出
關王漢監平賊鎮標楚蜀軍同侯恂等急擊王燮監陽
懷東晉軍刻期渡河總兵許定國以晉軍次沁水一夕
潰去寧武兵亦潰於懷慶詔逮定國七月河上之兵潰
督師丁啓睿保督楊文岳合左良玉虎大威楊德政方

國安諸軍次於朱仙鎮良玉走還襄陽諸軍皆潰啟睿
文岳奔汝寧詔山東總兵官劉澤清援開封城中食盡
名衡永福偕監司梁炳蘇壯吳士講同知蘇茂灼通判
彭士奇推官黃澍等守益堅澤清以兵來援諸軍並集
河北朱家寨不敢進澤清曰朱家寨去開封八里我以
兵五千南渡依河而營引水環之以次結八營直達大
堤築甬道輸河北之粟以餉城中賊兵已老可一戰走
也諸軍皆曰善乃以兵三千人先渡立營賊攻之戰三

晝夜諸軍無繼者甬道不就澤清拔營歸日夜望傅庭

出關不至賊圖開封者三士馬損傷多積憤誓必拔之

圍半年師老糧匱欲決黃河灌之以城中子女貨寶猶

豫不決聞秦師已東恐諸鎮兵夾擊欲變計會有獻計

於巡按御史嚴雲京者請決河以灌賊雲京語名衡澍

名衡澍以為然周王恭枵募民築羊馬牆堅厚如高岸

賊營直傳大堤河決賊可盡城中無虞我方鑿朱家寨

口賊知移營高阜艤艫巨筏以待而驅掠民夫數萬反

決馬家口以灌城九月癸未望夜半二口並決天大雨
連旬黃流驟漲聲聞百里丁夫荷鍤者隨堤漂沒十數
萬賊亦沉萬人河入自北門貫東南門以出流入於渦
水名衡永福乘小舟至城頭周王率其宮眷及寧鄉諸
郡王避水棲城樓坐兩絕食者七日王變以舟迎王王
從城上泛舟出名衡等皆出茂灼士奇久餓不能起並
溺死賊浮艦入城遺民俱盡拔營而西城初圍時百萬
戶後饑疫死者十二三汴梁佳麗甲中州羣盜心豔之

至是盡沒於水帝聞痛悼猶念諸臣拒守勞命叙功加
名衡兵部右侍郎名衡辭以疾即擢王漢右僉都御史
代名衡巡撫河南名衡歸未幾

大清兵破沂州名衡夫婦殉難王漢字子房掖縣人崇
禎十年進士除高平知縣調河內禽巨寇天壇山劉二
又乘雪夜破妖僧智善夜半渡河破賊楊六郎李自成
圍開封漢然火金龍口柳林為疑兵遣士死入賊中聲
言諸鎮兵來援各數十萬至矣賊聞則驚走漢為人負

氣愛士人有一長嗟歎之不容口僚屬紳士陳民疾苦
或言已過則瞿然下拜用兵士卒同甘苦人樂為之死
好用間賊中虛實莫不知攻天壇山賊山陡絕登者輓
以布漢持刀直上人服其勇時賊氛日熾帝每臨朝而
歎漢前後破賊功降旨優叙十五年春以減俸行取入
都與蘇京王變同名對稱旨命三臣皆以試御史監軍
漢監平賊鎮標楚蜀軍與督臣侯恂南援汴時兵部奏
援勦兵十萬十之四以屬京變屬漢以其六漢所監凡

五萬九千然大半已潰散兵部空名使之漢乃請自立
標營兵千人騎二百報可乃簡保營兵百餘人募邯鄲
鉅鹿壯士三百人又取故治河內所練義兵及修武濟
源素從征勦者五百人及親故子弟合千人八月朔夜
半襲賊范家灘斬一紅甲賊目檄諸將合勦自走襄陽
督左良玉兵救汴至潼關有詔漢巡按河南時賊灌開
封漢聞趣諸將自柳園夜半渡河伏兵西岸檄卜從善
等夾攻之斬首九十餘級遂入汴大張旗鼓為疑兵追

賊至朱仙鎮連戰皆捷巡撫高名衡謝病即擢漢右僉都御史代之漢乃廣間諜收土豪議屯田謀所以圖賊無何劉超反永城超永城人跛而狡為貴州總兵坐罪免上疏言兵計陳新甲用為河南總兵以私怨殺其鄉官御史魏景琦一家三十餘人懼罪遂據城反漢上疏請討語洩超得為備明年正月漢入永城聲言招撫為賊所殺參將陳治邦遊擊連光耀父子皆戰死遊擊馬魁負漢屍以出面如生詔贈兵部尚書廕錦衣世百戶

建祠致祭既而超伏誅傳首九邊

徐汧字九一長洲人生末期而孤稍長砥行有時名與同里楊廷樞相友善廷樞復社諸生所稱維斗先生者也天啓五年魏大中被逮過蘇州汧貸金資其行周順昌被逮緹騎橫索錢汧與廷樞斂財經理之當是時汧廷樞名聞天下崇禎元年汧成進士改庶吉士授檢討三年廷樞舉應天鄉試第一中允黃道周以救錢龍錫貶官倪元璐道周同年生請以已代謫帝不允汧上疏

頌道周元璐賢且自請罷黜帝詰責汧汧曰推賢讓能
蓋臣所務難進易退儒者之風間者陛下委任之意希
注外廷防察之權輒逮閤寺默窺聖意疑貳漸萌萬一
士風日賤宸嚮日移明盛之時為憂方大帝不聽汧尋
乞假歸還朝遷右庶子充日講官十四年奉使益王府
便道還家當是時復社諸生氣盛甚汧與廷樞顧杲華
允誠等往復尤契居久之京師陷福王召汧為少詹事
汧以國破君亡臣子不當叨位且痛宗社之喪亡由朋

黨相傾移書當事勸以力破異同之見既就職陳時政
七事惓惓以化恩讐去偏黨為言而安遠侯柳祚昌疏
攻汧謂朝服謁潞王於京口自恃東林巨魁與復社楊
廷樞顧杲諸奸狼狽相倚陛下定鼎金陵彼為討金陵
檄所云中原逐鹿南國指馬是何語乞置汧於理除廷
樞杲名其餘徒黨容臣次第糾彈時國事方棘事亦竟
寢汧移疾歸明年南京失守蘇常相繼下汧慨然太息
作書戒二子投虎邱新塘橋下死郡人赴哭者數千人

時又有一人儒冠藍衫而來躍虎邱劍池中土人憐而葬之卒不知何人也於是廷樞聞變走避之鄧尉山中久之四方弄兵者羣起廷樞負重名咸指目廷樞當事者執廷樞好言慰之廷樞嫚罵不已殺之蘆墟泗洲寺門人追紹原購其屍葬焉汧子枋字昭法舉十五年鄉試枋依隱有高行云

鹿善繼字伯順定興人祖久徵萬厯中進士授息縣知縣時詔天下度田各署上中下壤息獨以下田報曰度

田以紓民乃病民乎調襄垣擢御史以言事謫澤州判官遷榮澤知縣未任而卒父正苦節自礪縣令某欲見之方糞田投鍤而往急人之難傾其家不惜遠近稱鹿太公善繼端方謹慤由萬厯四十一年進士授戶部主事內艱除起故官遼左餉中絕廷臣數請發帑不報會廣東進金花銀善繼稽舊制金花貯庫備各邊應用乃奏記尚書李汝華曰與其請不發之帑何如留未進之金花華然之帝怒奪善繼俸一年趣補進善繼持不可

以死爭乃奪汝華俸二月降善繼一級調外汝華懼卒
補銀進泰昌改元復原官典新餉連疏請帑百萬不報
天啓元年遼陽陷以才改兵部職方主事大學士孫承
宗理兵部事推心任之及閱視關門以善繼從出督師
復表為贊畫布衣羸馬出入亭障間延見將卒相勞苦
拓地四百里收復城堡數十承宗倚之若左右手在關
四年累進員外郎郎中承宗謝事善繼亦告歸先是楊
左之獄起魏大中子學伊左光斗弟光明先後投鹿太

公家太公客之與所善義士容城舉人孫竒逢謀持書

走關門告其難於承宗承宗善繼謀借巡視薊門請入

覲奄黨大譁謂閣部將提兵清君側嚴旨阻之獄益急

五日一追賊撈掠甚酷太公急募得數百金輸之而兩

人者則皆已斃矣至是善繼歸而周順昌之獄又起順

昌善繼同年生善繼又為募得數百金金入而順昌又

斃奄黨居近善繼家難家子弟僕從相望於道太公曰

吾不懼也崇禎元年逆璫既誅善繼起尚寶卿遷太常

少卿管光祿丞事再請歸九年七月

大清兵攻定興善繼家在江村白太公請入扞城太公
許之與里居知州薛一鶚等共守守六日而城破善繼
死家人奔告太公太公曰嗟乎吾兒素以身許國今果
死夫復何憾事聞贈善繼大理卿謚忠節敕有司建祠
子化麟舉天啓元年鄉試第一伏闕訟父忠踰年亦卒
薛一鶚字百當由貢生為黃州通判荆王姬誣他姬酖
世子一鶚白其誣奄人傳太妃命欲竟其獄卒直之遷

蘭州知州州北有田沒於番吏派其賦於他戶後田復歸為衛卒所據而民出賦三十年一鶚核除其害至是佐善繼城守遂同死

贊曰士大夫致政里居無封疆民社之責可遜迹自全非以必死為勇也然而忼慨捐軀冒白刃而不悔湛宗覆族君子哀之豈非名義所在有重於生者乎氣節凜然要於自遂其志其英風義烈固不可泯沒於宇宙間矣

欽定四庫全書

明史卷二百六十七考證

張伯鯨傳微服遁還

臣黃壽齡按微服遁還考明史

紀事本末云賊殺守門御史王章守卒蟻陞伯鯨於是走匿民舍較傳特詳謹識

范淑泰傳淑泰發其停匿章奏狀

臣黃壽齡按停匿

章奏考一鵬及王應熊傳謂其改填月日與傳所載

微異謹識

范淑泰傳十二月

大清兵圍兗州

臣

黃壽齡按兵圍兗州恭按

太宗文皇帝實錄云崇德七年十二月兵圍錦州並查莊
烈帝本紀亦第言崇禎十五年十二月

大清兵趨曹濮俱未及兗州紀載互異謹識

高名衡傳名衡集衆守

臣

黃壽齡按明史紀事本末

名衡集衆守時賊兵砲及城中殺傷相繼軍餉告匱
周王恭枵出庫金五十萬買米麥至懸金募死士謂

能擊死一賊者予五十金謹識

馬名衡傳帝以陷福藩罪詔逮仙風

臣黃壽齡按明

史紀事本末背城而戰時一日三捷至仙風被逮聞之即自縊傳俱未詳載謹識

高名衡傳次于朱仙鎮

臣黃壽齡按諸軍次朱仙鎮

時考綏寇紀畧云生馘二十三人斬一千七百十有八級城乃克全傳未之載謹識

高名衡傳名衡永福偕監司梁炳蘓壯吳士講同知蘓

茂灼通判彭士奇推官黃澍等守益堅

臣黃壽齡

按名衡永福偕監司梁炳等守益堅考守汴日志時
任濬守曹門吳士講黃澍協守曹門王燮守北門桑
開第曹坤張文光協守北門梁炳守東門譚國禎協
守東門蘓壯守西門名衡與永福守南門較傳所載
特詳謹識

高名衡傳王燮以舟迎王

臣黃壽齡按王燮以舟迎

王而通鑑紀事則云侯恂以舟迎之綏寇紀略亦云

侯恂率總兵卜從善以舟迎王紀載互異謹識

高名衡傳加名衡兵部右侍郎

臣黃壽齡按加名衡

兵部右侍郎考守汴日志作左侍郎互異謹識

高名衡傳名衡辭以疾

臣黃壽齡按名衡辭以疾考

守汴日志云仍賞銀四十兩傳未之載謹識

徐汧傳陳時政七事

臣黃壽齡按七事傳未臚列他

書皆無可考謹識

徐汧傳周順昌被逮

臣黃壽齡按明史紀事本末云

周順昌被逮諸生五六百人於巡撫毛一鷺前懇其
疏救廷樞與焉此未之載謹附識

鹿善繼傳以言事謫澤州判官

臣

黃壽齡按以言事

謫澤州傳未詳所言何事他書亦無可考謹識

欽定四庫全書

附明史卷二百六十七考證後

乾隆四十一年

賜謚諸臣

耿蔭樓 薛一鶚

以上通謚節愍

宋 玫 高名衡 徐 沂 楊廷樞

以上通謚忠節

范淑泰 謚忠烈

欽定四庫全書蒼要卷六千八百六十一

史部

明史卷二百六十八

大學士張廷玉等奉 敕修

列傳第一百五十六

曹文詔

弟文耀

周遇吉

黃得功

曹文詔大同人勇毅有智畧從軍遼左歷事熊廷弼孫承宗積功至遊擊崇禎二年冬從袁崇煥入衛京師明

年二月總理馬世龍界所賜尚方劍令率參將王承允

張叔嘉都司左良玉等伏王田枯樹洪橋鏖戰有功遷

參將自大塹山轉戰逼遵化又從世龍等克大安城及

鮎魚諸關以興復四城功加都督僉事七月陝西賊熾

擢延綏東路副總兵賊渠王嘉允久據河曲四年四月

文詔克其城嘉允脫走轉掠至陽城南山文詔追及之

其下斬以降以功擢臨洮總兵官點燈子自陝入山西

文詔追之及於稷山論降七百人點燈子遁尋被獲伏

誅李老柴獨行狼陷中部巡撫練國事延綏總兵王承恩圍之五月慶陽賊郝臨菴劉道江援之會文詔西旋與榆林參政張福臻合勦馘老柴及其黨一條龍餘黨奔麾雲谷副將張弘業遊擊李明輔戰死文詔乃與遊擊左光先崔宗允李國奇分勦綏德宜君清澗米脂賊戰懷寧川黑泉峪封家溝綿湖峪皆大捷掃地王授首紅軍友李都司杜三楊老柴者神一魁餘黨也屯鎮原將犯平涼國事檄甘肅總兵楊嘉謨副將王性善扼之

賊走慶陽文詔從鄜州間道與嘉謨性善合五年三月
大戰西濠斬千級生禽杜三楊老柴餘黨糾他賊掠武
安監陷華亭攻莊浪文詔嘉謨至賊屯張麻村官軍掩
擊賊走高山遊擊曹變蛟馮舉劉成功平安等譟而上
賊潰走變蛟者文詔從子也會性善及甘肅副將李鴻
嗣參將莫與京等至共擊斬五百二十餘級追敗之咸
寧關又敗之關上嶺追至隴安嘉謨變蛟夾擊復敗之
賊餘衆數千欲走漢南為遊擊趙光遠所遏乃由長寧

驛走張家川其逸出清水者副將蔣一陽遇之敗都司
李宮用被報文詔乃縱反間給其黨殺紅軍友遂蹙敗
之水落城追至靜寧州賊奔據唐毛山變蛟先登殄其
衆可天飛郝臨庵劉道江為王承恩所敗退保鐵角城
獨行狼李都司走與合可天飛劉道江遂圍合水文詔
往救賊匿精銳以千騎逆戰誘抵南原伏大起城上人
言曹將軍已歿文詔持矛左右突匹馬縈萬衆中諸軍
望見夾擊賊大敗僵屍蔽野餘走銅川橋文詔率變蛟

舉嘉謨及參將方茂功等追及之大戰陷陣賊復大敗
尋與寧夏總兵賀虎臣固原總兵楊麒破賊甘泉之虎
兕凹麒復追賊安口河崇信窑白茅山皆大獲總督洪
承疇斬可天飛李都司於平涼降其將白廣恩餘賊分
竄文詔追擊之隴州平鳳間十月三戰三敗之遂蹙賊
耀州錐子山其黨殺獨行狼郝臨菴以降承疇戮四百
人餘散遣關中巨寇畧平巡撫御史范復粹彙奏首功
凡三萬六千六百有奇文詔功第一嘉謨次之承恩麒

又次之文詔在陝西大小數十戰功最多承疇不為叙
巡按御史吳甡推獎甚至復粹疏復上兵部抑其功卒
不叙當是時賊見陝兵盛多流入山西其魁紫金梁混
世王姬關鎖八大王曹操闖塌天興加哈利七大部多
者萬人少亦半之蹂躪汾州太原平陽御史張宸極言
賊自秦中來秦將曹文詔威名宿著士民為之謠曰軍
中有一曹西賊聞之心膽搖且嘗立功晉中而秦賊滅
且盡宜敕令入晉協勦於是命陝西山西諸將並受文

詔節制六年正月抵霍州敗賊汾河孟縣追及於壽陽

巡撫許鼎臣遣謀士張宰先大軍嘗賊賊驚潰六月文

詔追擊之斬混世王於碧霞村餘黨為猛如虎逐走遇

文詔兵方山復敗五臺孟定襄壽陽賊盡平鼎臣命文

詔軍平定備太原東張應昌軍汾州備太原西文詔連

敗賊太谷范村榆社太原賊幾盡帝以文詔功多敕所

過地多積糗糧以犒並敕文詔速平賊山西監視中官

劉中允言文詔勦賊徐溝孟定襄所司不給米反以礮

石傷士卒帝即下御史按問三月賊從河內上太行文
詔大敗之澤州賊走潞安文詔至陽城遇賊不擊自沁
水潛師還擊之芹地劉村塞斬首千餘四月賊屯潤城
其他部陷平順殺知縣徐明揚文詔至賊走乃夜半襲
潤城斬賊千五百紫金梁老回回自榆社走武鄉過天
星走高澤山文詔皆擊敗他賊圍涉縣聞文詔破賊黎
城解去五月帝遣中官孫茂霖為文詔內中軍賊犯沁
水文詔大敗之禽其魁大虎又敗之遼城毛嶺山西賊

既屢敗乃避文詔鋒多流入河北帝乃命文詔移師往討而賊已敗鄧玘兵於林縣文詔率五營軍夜襲破之七月大敗懷慶賊柴陵村馘其魁滾地龍又追斬老回回於濟源文詔在洪洞時與里居御史劉令譽忤及是令譽按河南而四川石砭土官馬鳳儀軍敗沒於侯家庄賴文詔馳退賊甫解甲與令譽相見語復相失文詔拂衣起面叱之令譽怒遂以鳳儀之敗為文詔罪部議文詔怙勝而驕乃調之大同七年七月

大清兵西征察罕還師入大同境攻拔得勝堡參將李
全自經遂攻圍懷仁縣及井坪堡應州文詔偕總督張
宗衡先駐懷仁固守八月圍解即移駐鎮城挑戰敗還
已而靈邱及他屯堡多失陷

大清兵亦旋十一月論罪文詔宗衡及巡撫胡沾恩竝
充軍邊衛令甫下山西巡撫吳牲薦文詔知兵善戰請
用之晉中乃命為援勦總兵官立功自贖當是時河南
禍尤劇帝已允兵部議敕文詔馳勦河南賊牲復抗疏

力爭請令先平晉賊後入豫帝不許而文詔以牲有恩
竟取道太原為牲所留會賊高加計已殲而鳳陽告陷
遂整兵南以八年三月會總督洪承疇於信陽承疇大
喜即令擊賊隨州文詔追斬賊三百八十有奇四月承
疇次汝州以賊盡入關中議還顧根本分命諸將扼要
害檄文詔入關文詔乃馳至靈寶謁承疇承疇以賊在
商雒聞官兵至必先走漢中而大軍由潼關入反在其
後乃令文詔由閬鄉取山路至雒南商州直擣賊巢復

從山陽鎮安洵陽馳入漢中遇其奔軼曰此行也道路
回遠將軍甚勞苦吾集關中兵以待將軍拊其背而遣
之文詔躍馬去五月五日抵商州賊去城三十里營火
滿山文詔夜半率從子參將變蛟守備鼎蛟都司白廣
恩等敗賊深林中追至金嶺川賊據險以千騎逆戰變
蛟大呼陷陣諸軍並進賊敗走變蛟勇冠三軍賊中聞
大小曹將軍名皆怖懼已而闖王八大王諸賊犯鳳翔
趨汧陽隴州文詔自漢中馳赴賊盡向靜寧泰安清水

秦州間衆且二十萬承疇以文詔所部合張全昌張外
嘉軍止六千衆寡不敵告急於朝未得命六月官軍遇
賊亂馬川前鋒中軍劉弘烈被執俄副將艾萬年柳國
鎮復戰死文詔聞之瞋目大罵亟詣承疇請行承疇喜
曰非將軍不能滅此賊顧吾兵已分無可策應者將軍
行吾将由涇陽趨淳化為後勁文詔乃以三千人自寧
州進遇賊真寧之湫頭鎮變蛟先登斬首五百追三十
里文詔率步兵繼之賊伏數萬騎合圍矢蜩集賊不知

為文詔也有小卒縛急大呼曰將軍救我賊中叛卒識之甚賊曰此曹總兵也賊喜圍益急文詔左右跳蕩手擊殺數十人轉鬪數里力不支拔刀自刎死遊擊平安以下死者二十餘人承疇聞拊膺大哭帝亦痛悼贈太子太保左都督賜祭葬世廕指揮僉事有司建祠春秋致祭文詔忠勇冠時稱明季良將第一其死也賊中為相慶弟文耀從兄征討數有功河曲之戰斬獲多後擊賊忻州戰死城下詔予贈卹從子變蛟自有傳

周遇吉錦州衛人少有勇力好射生後入行伍戰輒先登積功至京營遊擊京營將多勛戚中官子弟見遇吉質魯意輕之遇吉曰公等皆紈袴子豈足當大敵何不於無事時練膽勇為異日用而徒糜廩祿為同輩咸目笑之崇禎九年都城被兵從尚書張鳳翼數血戰有功連進二秩為前鋒營副將明年冬從孫應元等討賊河南戰光山固始皆大捷十一年班師進秩受賚明年秋復出討賊破胡可受於浙川降其全部楊嗣昌出師襄

陽遇吉從中官劉元斌往會會張獻忠將至房縣嗣昌
策其必窺渡鄖灘遣遇吉扼守槐樹關張一龍屯光化
賊遂不敢犯十二月獻忠敗於興安將走竹山竹溪遇
吉復以嗣昌令至化石街草店扼其要害賊自是盡入
蜀遇吉乃從元斌駐荆門專護獻陵明年與孫應元等
大破羅汝才於豐邑坪又明年與黃得功追破賊鳳陽
已而旋師敗他賊李青山於壽張追至東平殲滅幾盡
青山遂降屢加太子少保左都督十五年冬山西總兵

官許定國有罪論死以遇吉代之至則汰老弱繕甲仗
練勇敢一軍特精明年十二月李自成陷全陝將犯山
西遇吉以沿河千餘里賊處處可渡分兵扼其上流以
下流蒲坂屬之巡撫蔡懋德而請濟師於朝朝廷遣副
將熊通以二千人來赴十七年正月遇吉令通防河會
平陽守將陳尚智已遣使迎賊諷通還鎮說降遇吉叱
之曰吾受國厚恩寧從爾叛逆且爾統兵二千不能殺
賊反作說客邪立斬之傳首京師至二月七日太原陷

懋德死之賊遂陷忻州圍代州遇吉先在代遏其北犯
乃憑城固守而潛出兵奮擊連數日殺賊無算會食盡
援絕退保寧武賊亦踵至大呼五日不降者屠其城遇
吉四面發大礮殺賊萬人火藥且盡外圍轉急或請甘
言紿之遇吉怒曰若輩何怯邪今能勝一軍皆忠義即
不支縛我予賊於是設伏城內出弱卒誘賊入城亟下
閘殺數千人賊用礮攻城圯復完者再傷其四驍將自
成懼欲退其將曰我衆百倍於彼但用十攻一番進蔑

不勝矣自成從之前隊死後復繼官軍力盡城遂陷遇
吉巷戰馬蹶徒步跳蕩手格殺數十人身被矢如蝟竟
為賊執大罵不屈賊懸之高竿叢射殺之復斃其肉城
中士民感遇吉忠義巷戰殺賊不可勝計其舍中兒先
從遇吉出鬪死亡畧盡夫人劉氏素勇健率婦女數十
人據山巔公廨登屋而射每一矢斃一賊賊不敢逼縱
火焚之闔家盡死自成集衆計曰寧武雖破吾將士死
傷多自此達京師歷大同陽和宣府居庸皆有重兵倘

盡如寧武吾部下寧有子遺哉不如還秦休息圖後舉
刻期將遁而大同總兵姜瓖降表至自成大喜方宴其
使者宣府總兵王承廕表亦至自成益喜遂決策長驅
歷大同宣府抵居庸太監杜之秩總兵唐復通開門延
之京師遂不守矣賊每語人曰他鎮復有一周總兵吾
安得至此福王時贈太保謚忠武列祀旌忠祠

黃得功號虎山開原衛人其先自合肥徙早孤與母徐
居少負奇氣膽畧過人年十二母釀酒熟竊飲至盡母

責之笑曰償易耳時遼事急得功持刀雜行伍中出斬

首二級中賞率得白金五十兩歸奉母曰兒以償酒也

由是隸經畧為親軍累功至遊擊崇禎九年遷副總兵

分管京衛營十一年以禁軍從總督熊文燦擊賊於舞

陽鏐光固間最八月又從擊賊馬光玉於浙川之吳村

王家寨大破之詔加太子太師署總兵銜十三年從太

監盧九德破賊於板石畝賊革裏眼等五營降十四年

以總兵與王憲分護鳳陽泗州陵得功駐定遠張獻忠

攻桐城挾營將廖應登至城下誘降得功與劉良佐合
兵擊之於鮑家嶺賊敗遁追至潛山禽斬賊將闖世王
馬武三鷄子王興國三鷄子獻忠養子最號驍勇者也
得功箭傷面愈自奮與賊轉戰十餘日所殺傷獨多明
年移鎮廬州十七年封靖南伯福王立江南進封侯旋
命與劉良佐劉澤清高傑為四鎮初督輔史可法慮傑
跋扈難制故置得功儀真陰相牽制適登萊總兵黃蜚
將之任蜚與得功同姓稱兄弟移書請兵備非常得功

率騎三百由揚州往高郵迎之傑副將胡茂禎馳報傑
傑素忌得功又疑圖已乃伏精卒道中邀擊之得功行
至土橋方作食伏起出不意上馬舉鐵鞭飛矢雨集馬
踣騰他騎馳有驍騎舞槊直前得功大呼反鬪挾其槊
而扶之人馬皆糜復殺數十人跳入顏垣中哮聲如雷
追者不敢進遂疾馳至大軍得免方鬪時傑潛師擣儀
真得功兵頗傷而所俱行三百騎皆歿遂訴於朝願與
傑決一死戰可法命監軍萬元吉和解之不可會得功

有母喪可法來弔語之曰土橋之役無智愚皆知傑不義今將軍以國故捐盛怒而歸曲於高是將軍收大名於天下也得功色稍和終以所殺亡多為恨可法令傑償其馬復出千金為母賙得功不得已聽之明年傑欲趨河南規取中原詔得功與劉良佐守邳徐傑死得功還儀真傑家并將士妻子尚留揚州得功謀襲之朝廷急遣盧九德諭止得功遂移鎮廬州四月左良玉東下以清君側為名至九江病死軍中立其子夢庚命得功

趨上江禦之駐師荻港得功破夢庚於銅陵解其圍命
移家鎮太平一意辦賊論功加左柱國時

大清兵已渡江知福王奔分兵襲太平得功方收兵屯
蕪湖福王潛入其營得功驚泣曰陛下死守京城臣等
猶可盡力奈何聽奸人言倉卒至此且臣方對敵安能
扈駕王曰非卿無可仗者得功泣曰願效死得功戰荻
港時傷臂幾墮衣葛衣以帛絡臂佩刀坐小舟督麾下
八總兵結東前迎敵而劉良佐已先歸命大呼岸上招

降得功怒叱曰汝乃降乎忽飛矢至中其喉偏左得功知不可為擲刀拾所拔箭刺吭死其妻聞之亦自經總兵翁之琪投江死中軍田雄遂挾福王降得功粗猛不識文義江南初立王詔書指揮多出羣小得功得詔紙或對使罵裂之然忠義出天性聞以國事相規誠者輒屈已改不旋踵北來太子之獄得功抗疏爭曰東宮未必假冒先帝子即上子未有了無證明混然雷同者臣恐在廷諸臣諂徇者多抗顏者少即明白識認亦不敢

抗詞取禍矣時太子真偽莫敢決而得功忠憤不阿如
此得功每戰飲酒數斗酒酣氣益厲喜持鐵鞭戰鞭漬
血沾手腕以水濡之久乃得脫軍中呼為黃闖子始為
偏裨隨大帥立功名未嘗一當大敵及專鎮封侯不及
一年餘而南北轉徙主逃將潰無所一用其力束手就
殪與國俱亡而已其軍行紀律嚴下無敢犯所至人感
其德廬州桐城定遠皆為立生祠葬儀真方山母墓側
贊曰曹文詔等秉驍猛之資所向摧敗皆所稱萬人敵

也。大命既傾，良將顛蹶。三人者，忠勇最著，死事亦最烈，故別著於篇。

明史卷二百六十八

欽定四庫全書

明史卷二百六十八考證

曹文詔傳李老柴獨行狼陷中部巡撫練國事延綏總兵王承恩圍之

臣

黃壽齡按王承恩圍之謂敗賊

於廊州也考本紀係四年七月事此云四月紀載互異謹識

曹文詔傳追至隴安

臣

黃壽齡按追至隴安及後文

追至靜寧考本紀係五年四月事傳內敘事俱詳年

月此略之謹識

曹文詔傳蹂躪汾州太原平陽

臣黃壽齡按賊蹂躪

汾州太原平陽考本紀謂陷太寧澤州壽陽紀載互異謹識

曹文詔傳斬混世王于碧霞村餘黨為猛如虎逐走

臣黃壽齡按文詔斬混世王于碧霞村時猛如虎亦與有功不僅追逐餘黨也事詳猛如虎傳謹識

曹文詔傳即令擊賊隨州文詔追斬賊三百八十有奇

臣黃壽齡按莊烈帝本紀云文詔斬賊於隨州係八年二月事此云三月紀載互異謹識

周遇吉傳山西總兵官許定國有罪論死

臣黃壽齡

按許定國有罪傳未詳何事他書亦無可考謹識

黃得功傳得功破夢庚於銅陵

臣黃壽齡按史可法

傳得功於四月朔敗良玉軍此云四月良玉死得功趨上江禦庚庚軍紀載互異謹識

欽定四庫全書

附明史卷二百六十八考證後

乾隆四十一年

賜謚諸臣

曹文詔 專謚忠果

李全 專謚節愍

周遇吉 專謚忠武

黃得功 專謚忠桓



總校官編修臣吳紹潔